

ЎЗБЕКИСТОН РЕСПУБЛИКАСИ
ҚОНУНЧИЛИК
ТЎПЛАМИ

49-сон
(1069)
2022 йил
декабрь

Ўзбекистон Республикаси қонунчилик тўплами беш бўлимдан иборат:

биринчи бўлимда Ўзбекистон Республикаси қонунлари ва Ўзбекистон Республикаси Олий Мажлиси палаталарининг қарорлари эълон қилинади;

иккинчи бўлимда Ўзбекистон Республикаси Президентининг фармон ва қарорлари эълон қилинади;

учинчи бўлимда Вазирлар Маҳкамасининг қарорлари эълон қилинади;

тўртинчи бўлимда Ўзбекистон Республикаси Конституциявий судининг қарорлари эълон қилинади;

бешинчи бўлимда вазирликлар, давлат қўмиталари ва идораларининг Ўзбекистон Республикаси Адлия вазирлигида давлат рўйхатидан ўтказилган норматив-ҳуқуқий ҳужжатлари эълон қилинади.

МУНДАРИЖА

Биринчи бўлим

445. «Ўзбекистон Республикаси Ҳукумати билан Туркия Республикаси Ҳукумати ўртасида ҳарбий ҳадли Битимни (Тошкент, 2022 йил 29 март) ратификация қилиш ҳақида» Ўзбекистон Республикасининг 2022 йил 5 декабрдаги ЎРҚ–806-сон Қонуни
446. «Измир Шартномасини (Измир, 1996 йил 14 сентябрь) ратификация қилиш ҳақида» Ўзбекистон Республикасининг 2022 йил 5 декабрдаги ЎРҚ–807-сон Қонуни
447. ««Давлат божи тўғрисида»ги Ўзбекистон Республикаси Қонунига ўзгартиш ва қўшимчалар киритиш ҳақида» Ўзбекистон Республикасининг 2022 йил 6 декабрдаги ЎРҚ–808-сон Қонуни

Иккинчи бўлим

448. «Ер ости сув ресурсларини муҳофаза қилиш ва улардан оқилона фойдаланишни тартибга солиш бўйича қўшимча чора-тадбирлар тўғриси-

да» Ўзбекистон Республикаси Президентининг 2022 йил 7 декабрдаги ПҚ–439-сон қарори

Учинчи бўлим

449. «Электрон турдаги суғурта хизматларини кўрсатиш тартиби тўғрисидаги низомни тасдиқлаш ҳақида» Ўзбекистон Республикаси Вазирлар Маҳкамасининг 2022 йил 5 декабрдаги 694-сон қарори
450. «Даволаш-профилактика муассасаларининг илмий даражага эга бўлган ходимларига ҳар ойлик қўшимча ҳақ тўлаш тартиби тўғрисидаги низомни тасдиқлаш ҳақида» Ўзбекистон Республикаси Вазирлар Маҳкамасининг 2022 йил 9 декабрдаги 699-сон қарори

Бешинчи бўлим

451. Ўзбекистон Республикаси адлия вазирининг 2022 йил 5 декабрдаги 27-мх-сон «Фуқаролик ҳолати далолатномаларини қайд этувчи органлар томонидан гербли гувоҳномаларни тўлдириш қоидаларини тасдиқлаш ҳақида»ги буйруққа ўзгартиришлар киритиш тўғрисида»ги буйруғи (*Ўзбекистон Республикаси Адлия вазирлиги томонидан 2022 йил 6 декабрда рўйхатдан ўтказилди, рўйхат рақами 3098-1*)
452. Ўзбекистон Республикаси Саноат хавфсизлиги давлат қўмитасининг 2022 йил 29 ноябрдаги 09/ЮБ-36-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомни тасдиқлаш ҳақида»ги буйруқ, шунингдек унга ўзгартиришлар ва қўшимчани ўз кучини йўқотган деб топиш тўғрисида»ги қарори (*Ўзбекистон Республикаси Адлия вазирлиги томонидан 2022 йил 9 декабрда рўйхатдан ўтказилди, рўйхат рақами 2045-5*)
453. Ўзбекистон Республикаси Олий ва ўрта махсус таълим вазирлигининг 2022 йил 24 ноябрдаги 22-2022-сон ҳамда Бандлик ва меҳнат муносабатлари вазирлигининг 2022 йил 16 ноябрдаги 32-2022/ҚҚ-сон «Академик лицейлар битирувчиларига мутахассисликлар бериш тартиби тўғрисидаги низомга ўзгартиришлар киритиш ҳақида»ги қарори (*Ўзбекистон Республикаси Адлия вазирлиги томонидан 2022 йил 9 декабрда рўйхатдан ўтказилди, рўйхат рақами 2882-2*)
454. Ўзбекистон Республикаси молия вазирининг 2022 йил 10 ноябрдаги 61-сон «Ўзбекистон Республикаси ҳудудида қўллаш учун молиявий ҳисоботнинг халқаро стандартлари ва унга тушунтиришлар матнини тан олиш тўғрисида»ги буйруғи (*Ўзбекистон Республикаси Адлия вазирлиги томонидан 2022 йил 9 декабрда рўйхатдан ўтказилди, рўйхат рақами 3400*)

Вазирликлар, давлат қўмиталари ва идораларнинг норматив-ҳуқуқий ҳужжатларини давлат рўйхатидан ўтказиш ҳолати тўғрисидаги маълумот

БИРИНЧИ БЎЛИМ**ЎЗБЕКИСТОН РЕСПУБЛИКАСИНИНГ ҚОНУНИ****445 Ўзбекистон Республикаси Ҳукумати билан Туркия Республикаси Ҳукумати ўртасида ҳарбий ҳадли Битимни (Тошкент, 2022 йил 29 март) ратификация қилиш ҳақида***

Қонунчилик палатаси томонидан 2022 йил
8 ноябрда қабул қилинган

Сенат томонидан 2022 йил 18 ноябрда
маъқулланган

Ўзбекистон Республикаси Ҳукумати билан Туркия Республикаси Ҳукумати ўртасида ҳарбий ҳадли Битим (Тошкент, 2022 йил 29 март) ратификация қилинсин.

**Ўзбекистон Республикасининг
Президенти**

Ш. МИРЗИЁЕВ

Тошкент ш.,
2022 йил 5 декабрь,
ЎРҚ–806-сон

* Ушбу Қонун «Қонунчилик маълумотлари миллий базаси»да 2022 йил 6 декабрда эълон қилинган.

ЎЗБЕКИСТОН РЕСПУБЛИКАСИНИНГ ҚОНУНИ

446 Измир Шартномасини (Измир, 1996 йил 14 сентябрь) ратификация қилиш ҳақида*

Қонунчилик палатаси томонидан 2022 йил
8 ноябрда қабул қилинган

Сенат томонидан 2022 йил 18 ноябрда
маъқулланган

Измир Шартномаси (Измир, 1996 йил 14 сентябрь) ратификация қилин-
син.

**Ўзбекистон Республикасининг
Президенти**

Ш. МИРЗИЁЕВ

Тошкент ш.,
2022 йил 5 декабрь,
ЎРҚ–807-сон

* Ушбу Қонун «Қонунчилик маълумотлари миллий базаси»да 2022 йил 6 декабрда эълон қилинган.

ЎЗБЕКИСТОН РЕСПУБЛИКАСИНИНГ ҚОНУНИ

447 «Давлат божи тўғрисида»ги Ўзбекистон Республикаси Қонунига ўзгартиш ва қўшимчалар киритиш ҳақида*

Қонунчилик палатаси томонидан 2022 йил
11 майда қабул қилинган

Сенат томонидан 2022 йил 19 ноябрда
маъқулланган

1-модда. Ўзбекистон Республикасининг 2020 йил 6 январда қабул қилинган «Давлат божи тўғрисида»ги ЎРҚ–600-сонли Қонунига (Ўзбекистон Республикаси Олий Мажлиси палаталарининг Ахборотномаси, 2020 йил, № 1, 1-модда, № 3, 201-модда, № 5, 298-модда, № 10, 593-модда, № 12, 691-модда; 2021 йил, № 1, 13-модда, 4-сонга илова, № 7, 661-модда, № 8, 800, 803-моддалар, № 10, 968-модда; 2022 йил, № 2, 76-модда, № 3, 214, 216-моддалар, № 4, 340-модда) қуйидаги ўзгартиш ва қўшимчалар киритилсин:

1) **5-модданинг 13-банди** қуйидаги таҳрирда баён этилсин:

«13) чет эл тижорат ташкилотларининг Ўзбекистон Республикаси ҳудудидаги ваколатхоналарини аккредитация қилганлик учун»;

2) **11-модда 5-бандининг тўртинчи хатбошиси** қуйидаги таҳрирда баён этилсин:

«банклардаги омонатлар, шахсий ва мулкый суғурта шартномалари бўйича суғурта суммалари, давлат заём облигациялари, иш ҳақи суммалари, шахсий жамғариб бориладиган пенсия ҳисобварағидаги пул маблағлари учун»;

3) **16-модданинг:**

тўртинчи қисми «давлат органлари ва ташкилотлари» деган сўзлардан кейин «шунингдек хусусий амалиёт билан шуғулланувчи нотариуслар» деган сўзлар билан тўлдирилсин;

бешинчи қисми «давлат органлари ва ташкилотлари» деган сўзлардан кейин «шунингдек хусусий амалиёт билан шуғулланувчи нотариуслар» деган сўзлар билан тўлдирилсин;

4) **илованинг:**

4-банди:

«**а**» **кичик банди** қуйидаги таҳрирда баён этилсин:

«

а) кўчмас мол-мулкни бошқа шахсга ўтказиш билан боғлиқ шартномаларни тасдиқлаганлик учун	
агар кўчмас мол-мулк Тошкент, Нукус шаҳарларида ва вилоят марказларида жойлашган бўлса	— БҲМнинг 1 баравари
агар кўчмас мол-мулк бошқа аҳоли пунктларида жойлашган бўлса	— БҲМнинг 50 фоизи
Изоҳ. Мулкдорнинг хотинига (эрига), унинг ва хотинининг (эрининг) ота-онасига, болаларига ва уларнинг эрига ёки хотинига, набираларига, бувиларига, буваларига, ака-укалари ва опа-сингилларига кўчмас мол-мулкни ўтказиш билан боғлиқ шартномалар	

* Ушбу Қонун «Қонунчилик маълумотлари миллий базаси»да 2022 йил 7 декабрда эълон қилинган.

расмийлаштирилаётганда давлат божи белгиланган ставканинг 50 фоизи миқдорда ундирилади.

»;

«г», «д» ва «е» кичик бандлари қуйидаги таҳрирда баён этилсин:

«

г) мол-мулкни ижарага бериш шартномасини тасдиқлаганлик ёки унга ўзгартишлар киритганлик учун	
мулкдорнинг хотинига (эрига), унинг ва хотинининг (эрининг) ота-онасига, болаларига ва уларнинг эрига ёки хотинига, набираларига, бувиларига, буваларига, ака-укалари ва опа-сингилларига	— БҲМнинг 10 фоизи
жисмоний шахслар учун	— БҲМнинг 25 фоизи
юридик шахслар учун ёки агар тарафлардан бири юридик шахс бўлса	— БҲМнинг 50 фоизи
Изоҳ. Мол-мулкни ижарага бериш шартномасини бекор қилганлик учун давлат божи белгиланган ставканинг 50 фоизи миқдорда ундирилади.	
д) мол-мулкдан текин фойдаланиш шартномаларини тасдиқлаганлик учун, бундан «п» кичик бандда белгиланган ҳоллар мустасно	— БҲМнинг 25 фоизи
е) гаров, ипотека ва лизинг шартномаларини тасдиқлаганлик учун	
жисмоний шахслар учун:	— БҲМнинг 1 баравари
юридик шахслар учун ёки агар тарафлардан бири юридик шахс бўлса	— БҲМнинг 2 баравари
Изоҳ. Гаров, ипотека ва лизинг шартномаларига ўзгартиш ва қўшимчалар киритиш ҳақидаги битимлар расмийлаштирилаётганда давлат божи белгиланган ставканинг 50 фоизи миқдорда ундирилади.	

»;

«з» кичик банди қуйидаги таҳрирда баён этилсин:

«

з) қарз шартномаларини тасдиқлаганлик учун	— БҲМнинг 25 фоизи
Изоҳ. Қарз шартномасига ўзгартишлар киритганлик ёки уни бекор қилганлик учун давлат божи белгиланган ставканинг 50 фоизи миқдорда ундирилади.	

»;

«о» ва «п» кичик бандлари қуйидаги таҳрирда баён этилсин:

«

о) автомобилотранспорт воситаларини бошқа шахсга ўтказиш шартномаларини тасдиқлаганлик учун давлат божи қуйидаги миқдорларда ундирилади	
автомобилотранспорт воситалари учун	— БҲМнинг 3 баравари
битта мототранспорт, мотоаравача, мотоқайиқ учун	— БҲМнинг 25 фоизи
Изоҳ. Айирбошлаш шартномаси расмийлаштирилаётганда давлат божи фақат бир автомобилотранспорт воситаси учун ундирилади. Қуйидаги шартномаларни расмийлаштиришда: мулкдорнинг хотинига (эрига), унинг ва хотинининг (эрининг) ота-онасига, болаларига ва уларнинг эрига ёки хотинига, набираларига, бувиларига, буваларига, ака-укалари ва опа-сингилларига автомобилотранспорт воситаларини ўтказиш шартномалари расмийлаштирилаётганда давлат божи белгиланган ставканинг 5 фоизи миқдорда ундирилади; банк кредитлари ҳисобига сотиб олинган автомобилотранспорт воситаларининг олди-сотдиси учун давлат божи белгиланган ставканинг 10 фоизи миқдорда ундирилади;	

Йўл-транспорт ҳодисаси натижасида шикастланган автототранспорт воситаларини бошқа шахсга ўтказиш шартномалари расмийлаштириладиганда давлат божи миқдори шу транспорт воситалари яроқлигининг қолдиқ фоизига қараб ўзгартирилади ҳамда унинг миқдори битим тарафларининг хоҳишига кўра ва нотариуснинг топшириғига биноан Ўзбекистон Республикаси Адлия вазирлигининг суд-экспертиза муассасалари мутахассислари, бундай муассасалар бўлмаган ҳудудларда эса — «Ўзавтотеххизмат» масъулияти чекланган жамияти ташкилотлари томонидан белгиланади.	
п) автототранспорт воситаларини бошқаришга ва тасарруф қилишга оид ишончномаларни, шунингдек автототранспорт воситаларидан текин фойдаланиш шартномаларини тасдиқлаганлик учун	
мулкдорнинг хотинига (эрига), унинг ва хотинининг (эрининг) ота-онасига, болаларига ва уларнинг эрига ёки хотинига, набираларига, бувиларига, буваларига, ака-укалари ва опасингилларига, жиянларига	— БХМнинг 50 фоизи
бошқа шахсларга	— БХМнинг 2 баравари

»;

«**ф**» кичик бандининг изоҳи қуйидаги мазмундаги **иккинчи хатбоши** билан тўлдирилсин:

«Қарз шартномасидан келиб чиқадиган пул суммаларини ундириш тўғрисидаги ижро варақаларини берганлик учун давлат божи белгиланган ставканинг 50 фоизи миқдоридан ундирилади»;

18-банди қуйидаги таҳрирда баён этилсин:

«

18. Чет эл фуқаролари иштирокидаги никоҳларнинг тузилганлигини, шунингдек никоҳларнинг бекор қилинганлигини рўйхатдан ўтказганлик учун:	
Ўзбекистон Республикаси фуқароларининг чет эл фуқаролари билан никоҳларини, шунингдек чет эл фуқароларининг ўзаро никоҳларини рўйхатдан ўтказганлик учун	— БХМнинг 2 баравари

».

2-модда. Ўзбекистон Республикаси Адлия вазирлиги ва бошқа манфаатдор ташкилотлар ушбу Қонуннинг ижросини, ижрочиларга етказилишини ҳамда моҳияти ва аҳамияти аҳоли ўртасида тушунтирилишини таъминласин.

3-модда. Ўзбекистон Республикаси Вазирлар Маҳкамаси:

хукумат қарорларини ушбу Қонунга мувофиқлаштирсин;

давлат бошқаруви органлари ушбу Қонунга зид бўлган ўз норматив-ҳуқуқий ҳужжатларини қайта кўриб чиқишлари ва бекор қилишларини таъминласин.

4-модда. Ушбу Қонун расмий эълон қилинган кундан эътиборан кучга киради.

**Ўзбекистон Республикасининг
Президенти**

Ш. МИРЗИЁЕВ

Тошкент ш.,
2022 йил 6 декабрь,
ЎРҚ–808-сон

ИККИНЧИ БЎЛИМ**ЎЗБЕКИСТОН РЕСПУБЛИКАСИ ПРЕЗИДЕНТИНИНГ
ҚАРОРИ****448 Ер ости сув ресурсларини муҳофаза қилиш ва улардан оқилона фойдаланишни тартибга солиш бўйича қўшимча чора-тадбирлар тўғрисида***

Республикада ер ости сувларидан фойдаланиш ва қудуқ бурғилаш тизимини янада такомиллаштириш, ер ости сув ресурсларини муҳофаза қилиш бўйича давлат ва жамоатчилик назоратини кучайтириш, аҳоли орасида сувдан оқилона фойдаланиш маданиятини кенг тарғиб қилиш, уларнинг миқдор жиҳатдан камайиб кетиши ва ифлосланишининг олдини олиш ҳамда пировард натижада аҳолини узоқ муддатли истиқболда сифатли ичимлик сув билан таъминлаш мақсадида:

1. Ер ости сувларига қудуқ бурғилаш ва улардан фойдаланиш бўйича мораторий жорий этиладиган, ер ости сувлари сатҳи пасайиб кетаётган ҳудудлар рўйхати 1-иловага** мувофиқ тасдиқлансин.

Белгилансинки, 2023 йил 1 январдан бошлаб:

а) ер ости сувларининг кўп йиллик ўртача сатҳига нисбатан сув сатҳи 5 метрдан ортиқ пасайиб кетган ҳудудларда ерларни суғориш ва ишлаб чиқариш мақсадларига гидрогеологик хулоса бериш, ер ости сувларига қудуқларни бурғилаш ҳамда мавжуд қудуқлардан ерларни сув тежовчи технологияларсиз суғориш тақиқланади, бундан тасдиқланган давлат дастурлари доирасида ва жисмоний шахслар томонидан чуқурлиги 25 метргача бўлган қудуқларни бурғилаш ҳамда суткасига 5 метр кубгача ҳажмдаги ер ости сувларини шахсий эҳтиёжлар учун яқка тартибда олиш мустасно;

б) ер ости сувларининг кўп йиллик ўртача сатҳига нисбатан сув сатҳи 5 метргача пасайган ҳудудларда ер ости сувларига қудуқларни бурғилашга гидрогеологик хулоса ва сувдан махсус фойдаланишга рухсатнома Давлат геология ва минерал ресурслар қўмитаси (кейинги ўринларда — Давлат геология қўмитаси) томонидан:

қишлоқ хўжалиги экин майдонларини суғориш мақсадлари учун — сув тежовчи технологияларни жорий этиш шартлари билан Сув хўжалиги вазирлиги билан келишилган ҳолда;

ишлаб чиқариш эҳтиёжлари учун — ҳудудий ривожлантириш дастурлари ва сувдан тежамли фойдаланиш шартларига асосан Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари билан келишилган ҳолда берилади;

* Ушбу қарор «Қонунчилик маълумотлари миллий базаси»да 2022 йил 12 декабрда эълон қилинган.

** 1-илова «Қонунчилик маълумотлари миллий базаси»да эълон қилинган.

в) қишлоқ хўжалиги экинларини сугоришда сув тежовчи технологиялардан (томчилатиб, ёмғирлатиб, дискрет ва бошқалар) фойдаланилмаганда бурғи қудуқларидан фойдаланишни тақиқлаш Давлат геология қўмитаси ҳузуридаги Кон-геология фаолиятини назорат қилиш инспекцияси (кейинги ўринларда — Инспекция) томонидан амалга оширилади.

2. Шундай тартиб ўрнатилсинки, унга мувофиқ 2023 йил 1 апрелдан бошлаб:

ер ости сувларига қудуқларни бурғилаш учун рухсатнома беришнинг амалдаги тартиби бекор қилинади ҳамда Давлат геология қўмитаси томонидан юридик шахслар ва яқка тартибдаги тадбиркорларга (кейинги ўринларда — бурғиловчи субъектлар) ер ости сувларига қудуқларни бурғилаш фаолиятига рухсатнома бериш тартиби жорий этилади;

бурғиловчи субъектларга ўз тасарруфидаги бурғилаш ускуналарини GPS-трекерлар билан жиҳозлаш ва уларни доимо ишчи ҳолатда сақлаш мажбурияти юклатилади;

қонунчиликда назарда тутилган тегишли техник ҳужжатларга эга бўлмаган бурғилаш ускуналари ёрдамида ер ости сувларига қудуқларни бурғилаш тақиқланади ва Инспекция томонидан бундай ҳолатлар аниқланган тақдирда, бурғилаш ускуналарини мусодара қилиш юзасидан судга мурожаат этилади;

ер ости сувларига қудуқларни бурғилаш фаолиятига рухсатноманинг талаб ва шартларини бажармаганлик унинг амал қилишини тўхтатиб туришга, гидрогеологик хулосасиз бурғилаш ишларини олиб бориш эса рухсатномани бекор қилишга асос бўлади;

ер ости сув олиш иншоотларига (бурғи қудуғи, булоқ каптажи) эга бўлган барча ер ости сувларидан фойдаланувчиларга йиллик сув олиш миқдори тўғрисидаги ҳисоботни белгиланган тартибда Давлат геология қўмитасининг ҳудудий гидрогеология станцияларига топшириш мажбурияти юкланади;

вазирлик ва идоралар, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари томонидан шакллантирилдиган ер ости сувлари ҳисобига сув таъминотини яхшилаш бўйича истиқболли дастурлар Давлат геология қўмитаси билан келишилиши шарт.

3. Ер ости сув сатҳи пасайиб кетаётган ҳудудларда сувдан оқилона фойдаланиш ва сув сатҳи камайишининг олдини олиш бўйича комплекс чора-тадбирлар режаси 2-иловага* мувофиқ тасдиқлансин.

Комплекс чора-тадбирлар режасида назарда тутилган тадбирларнинг ўз вақтида ва сифатли бажарилишини таъминлаш юзасидан масъулият тегишли вазирлик ва идоралар раҳбарлари зиммасига юклансин.

4. Давлат геология қўмитаси Ахборот технологиялари ва коммуникацияларини ривожлантириш вазирлиги билан биргаликда ер ости сувлари ҳолатининг, уларда бўлаётган ўзгаришларнинг онлайн назоратини ўрнатиш мақсадида:

2023 йил 1 майга қадар Давлат геология қўмитаси таркибидаги «Ўзбек-

* 2-илова «Қонунчилик маълумотлари миллий базаси»да эълон қилинган.

гидрогеология» ДУК томонидан ер ости сувлари мониторингининг рақамли маълумотлар базаси ва интерактив харитасини тайёрлаш бўйича замонавий ускуналар ва дастурий таъминотлар билан жиҳозланган ситуацион марказ фаолияти йўлга қўйилишини;

яратилган ер ости сувларидан фойдаланувчиларнинг электрон маълумотлар базаси 2023 йил 1 майдан бошлаб Давлат солиқ қўмитасининг маълумотлар базалари билан интеграция қилинишини таъминласин.

5. Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари ҳамда Маҳалла ва нуронийларни қўллаб-қувватлаш вазирлиги мазкур қарор расмий эълон қилинган кундан бошлаб фуқаролар йиғинлари аъзолари томонидан ўзларига бириктирилган ҳудудларда ер ости сувларига қудуқларни бурғилаш ҳолатлари бўйича Инспекцияга ёки ҳудудий гидрогеология станцияларига хабар бериб борилишини таъминласин.

6. Белгилансинки, ер ости сувларидан фойдаланувчиларга:

2024 йил 1 январга қадар ер ости сувларидан фойдаланишнинг аниқ ҳисобини юритиш мақсадида ўз тасарруфидаги ер ости сув олиш иншоотларини сув ҳисоблаш воситалари билан белгиланган тартибда жиҳозлаш мажбурияти юклатилади;

2024 йил 1 январдан бошлаб сувни ҳисобга олиш воситалари билан жиҳозланмаган ер ости сув олиш иншоотларидан фойдаланиш тақиқланади (бундан жисмоний шахсларга шахсий ва хўжалик эҳтиёжлари учун яқка тартибда суткасига 5 метр кубгача бўлган миқдорда ер ости сувларини олиш мустасно).

7. Давлат солиқ қўмитаси:

ер ости сувларидан фойдаланувчилар томонидан сув олиш иншоотларида ўрнатилган сувни ҳисобга олиш воситалари пломбаланиши, рўйхатга олинishi ва ишчи ҳолатининг мониторингини таъминлаб борсин;

ер ости сувларидан фойдаланувчилар томонидан сувни ҳисобга олиш воситаларисиз сув олинганида солиқ тўловини белгиланган солиқ ставкасининг беш баравари миқдорида ундириш чораларини кўрсин.

8. Иқтисодий тараққиёт ва камбағалликни қисқартириш вазирлиги ҳамда Давлат геология қўмитасининг:

ҳудудларда ер ости сувларига қудуқларни бурғилаш ва улардан самарали фойдаланиш соҳасида давлат назоратини кучайтириш мақсадида Инспекция штат жадвалига тизим ташкилотлари бошқарув ходимлари сонини мос равишда қисқартириш ҳисобидан 13 та инспектор лавозимини киритиш;

«Ўзбекгидрогеология» ДУК таркибига «Хавфли геологик жараёнларни кузатиш давлат хизмати» давлат муассасасини киритиш орқали республикада ер ости сувлари ҳамда хавфли геологик жараёнларнинг ягона мониторинг тизимини ташкил этиш тўғрисидаги таклифларига розилик берилсин.

9. Давлат геология қўмитаси:

а) 2023 йил 1 январга қадар ер ости сувларига қудуқларни ноқонуний бурғилаш ва улардан фойдаланиш, шунингдек, хавфли геологик жараёнлар-

нинг олдини олиш бўйича кўрсатма талабларини бажармаганлик учун жавобгарликни кескин кучайтириш, бунда маъмурий ҳуқуқбузарлик тўғрисидаги ишларнинг Инспекцияга тааллуқлилигини белгилаш бўйича қонун ҳужжатларига ўзгартириш ва қўшимчалар киритиш тўғрисидаги қонун лойиҳасини Вазирлар Маҳкамасига киритсин;

б) 2023 йил 30 январга қадар ер ости сувларига қудуқларни бурғилаш фаолиятига рухсатнома бериш бўйича давлат хизматлари кўрсатишнинг маъмурий регламенти ҳамда ер ости сув олиш иншоотларида сувни ҳисобга олиш воситаларини ўрнатиш ва улардан фойдаланиш тартибини тасдиқловчи Ҳукумат қарори лойиҳасини Вазирлар Маҳкамасига киритсин;

в) 2023 йил 1 январдан бошлаб Ички ишлар вазирлиги, Мудофаа вазирлиги билан биргаликда ер ости сувларига қудуқларни бурғилаш билан шуғулланувчи юридик шахслар ва якка тартибдаги тадбиркорларни аниқлаш мақсадида республикадаги махсус транспорт воситаларининг (ер ости сувларига қудуқлар бурғилаш ускуналарининг) ягона электрон базасини шакллантириб борсин;

г) сув сатҳи пасайиб кетаётган ҳудудларда ер ости сувлари давлат мониторингини кучайтирсин ҳамда натижаларига кўра ҳар йили 1 апрелга қадар қуйидагилар бўйича асослантирилган таклифларни Вазирлар Маҳкамасига киритиб борсин:

ҳудудларда белгиланган чеклов чораларини давом эттириш, юмшатиш ёки бекор қилиш;

чекловлар қўлланилган ҳудудлар майдонини ўзгартириш ёки янги ҳудудларни қўшиш;

қўшимча чораларни қўллаш ҳамда мазкур ҳудудларда ер ости сувларини муҳофаза қилиш ва улардан оқилона фойдаланиш билан боғлиқ бошқа масалалар.

Бунда, Вазирлар Маҳкамаси киритилган таклифларга мувофиқ, мораторий жорий этилган ҳудудлар майдонига ва тегишли чекловларга ўзгартириш ва қўшимчалар киритиш чораларини кўрсин;

д) мораторий жорий этилган ҳудудлар тўғрисидаги йиллик маълумотлар ўзининг расмий веб-сайтида ва қонунчиликда тақиқланмаган бошқа очиқ манбаларда эълон қилиб борилишини таъминласин;

е) 2023 — 2027 йилларда ҳар йилги минерал хомашё базасини ривожлантириш ва қайта тўлдириш давлат дастурлари доирасида сув сатҳи пасайиб кетаётган ҳамда интенсив тарзда эксплуатация қилинаётган ер ости сув конлари ресурсларини тубдан қайта баҳолаш бўйича геология-қидирув ишларини амалга оширсин.

10. Ер ости сувлари бўйича геологик тадқиқотларни олиб бориш, сув ресурсларини муҳофаза қилиш ва улардан оқилона фойдаланиш соҳасида илғор хорижий тажрибани жорий этиш мақсадида Давлат геология қўмитаси соҳага оид тажрибали консультантлар билан биргаликда:

икки ой муддатда «Ўзбекгидрогеология» ДУКнинг таркибий бўлинмаси сифатида ер ости сувларининг ҳолатини мониторинг қилиш ва улардан самарали фойдаланиш, аҳоли ва объектларни рўй бериши мумкин бўлган хавфли

геологик жараёнлардан муҳофаза қилишга қаратилган Давлат геологик мониторинг хизмати фаолиятини йўлга қўйсин;

2023 йилги минерал хомашё базасини ривожлантириш ва қайта тўлдириш давлат дастури лойиҳасида Давлат геологик мониторинг хизматини тубдан модернизация қилиш мақсадида замонавий алоқа, мобил лаборатория, ўлчов-кузатув қурилмалари, асбоб-ускуна ҳамда автотранспорт воситалари билан таъминлашни назарда тутсин;

2023 йил 1 апрелга қадар ўз тасарруфидаги гидрогеология корхонасининг бурғилаш ускуналарини GPS-трекерлар билан жиҳозлашни ҳамда уларнинг онлайн режимда мониторингини йўлга қўйсин;

2023 йилдан бошлаб соҳадаги хорижий ташкилотлар билан тизимли равишда тажриба алмашувини ва иқтидорли ёш мутахассисларнинг хорижда малакасини оширишни таъминлаб борсин.

11. Худудларда ер ости сув ресурсларини муҳофаза қилиш ва улардан оқилона фойдаланиш бўйича амалий чора-тадбирлар режаси 3-иловага* мувофиқ тасдиқлансин.

12. Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари:

бир ҳафта муддатда мазкур қарорга 3-иловадан келиб чиқиб, тегишли худудларда ер ости сув ресурсларини муҳофаза қилиш ва улардан оқилона фойдаланиш бўйича «йўл хариталари»ни тасдиқласин;

Инспекция, Давлат солиқ қўмитаси ҳамда Экология ва атроф муҳитни муҳофаза қилиш давлат қўмитаси билан биргаликда доимий асосда ер ости сув қудуқларини ноқонуний бурғилаш ва сув олиш ҳолатлари устидан назоратни кучайтирсин ва таъсирчан чоралар қўриб борсин.

13. Ўзбекистон Миллий телерадиокомпанияси Давлат геология қўмитаси, Экология ва атроф муҳитни муҳофаза қилиш давлат қўмитаси, Уй-жой коммунал хизмат кўрсатиш вазирлиги, Сув хўжалиги вазирлиги, Қорақалпоғистон Республикаси Вазирлар Кенгаши, вилоятлар ва Тошкент шаҳри ҳокимликлари билан биргаликда ер ости сув ресурсларини муҳофаза қилиш ва улардан оқилона фойдаланиш соҳасидаги долзарб масалалар юзасидан тизимли равишда телекўрсатувлар ва радиоэшиттиришлар тайёрланиши ва эфирга узатилишини таъминласин.

14. Ўзбекистон Республикаси Президентининг ва Ўзбекистон Республикаси Ҳукуматининг айрим қарорларига 4-иловага* мувофиқ ўзгартиришлар киритилсин.

15. Ўзбекистон Республикаси Президентининг айрим қарорлари 5-иловага мувофиқ ўз кучини йўқотган деб ҳисоблансин.

16. Мазкур қарорнинг ижросини самарали ташкил қилишга масъул ва шахсий жавобгар этиб Давлат геология қўмитаси раисининг ўринбосари А.А. Кадирходжаев, сув хўжалиги вазирининг биринчи ўринбосари А.С. Назаров ва Давлат солиқ қўмитаси раисининг биринчи ўринбосари М.М. Мирзаев белгилансин.

Қарор ижросини муҳокама қилиб бориш, масъул идоралар фаолиятини

* 3-4-иловалар «Қонунчилик маълумотлари миллий базаси»да эълон қилинган.

мувофиқлаштириш ва назорат қилиш Ўзбекистон Республикаси Бош вазири-нинг Геология, кон-металлургия соҳалари ва саноатни ривожлантириш масалалари бўйича маслаҳатчиси Б.Ф. Исламов зиммасига юклансин.

**Ўзбекистон Республикаси
Президенти**

Ш. МИРЗИЁЕВ

Тошкент ш.,
2022 йил 7 декабрь,
ПҚ-439-сон

Ўзбекистон Республикаси
Президентининг 2022 йил 7 декабрдаги
ПҚ-439-сон қарорига
5-ИЛОВА

**Ўзбекистон Республикаси Президентининг ўз кучини йўқотган
деб эътироф этилаётган айрим қарорлари
РЎЙХАТИ**

1. Ўзбекистон Республикаси Президентининг 2018 йил 1 мартдаги «Ўзбекистон Республикаси Давлат геология ва минерал ресурслар қўмитаси фаолиятини тубдан такомиллаштириш чора-тадбирлари тўғрисида»ги ПҚ-3578-сон қарорининг 9-банди, 10-банднинг иккинчи хатбошиси ҳамда қарорга 3 ва 4-иловалар.

2. Ўзбекистон Республикаси Президентининг 2019 йил 19 сентябрдаги «Ўзбекистон Республикаси Президентининг айрим қарорларига ўзгартириш ва қўшимчалар киритиш тўғрисида»ги ПҚ-4461-сон қарорига илованинг 5-банди.

3. Ўзбекистон Республикаси Президентининг 2020 йил 30 июндаги «Табиатни муҳофаза қилиш давлат муассасаси шаклидаги китоб геология миллий табиат боғини ташкил этиш тўғрисида»ги ПҚ-4766-сон қарорига илованинг 2-банди.

УЧИНЧИ БЎЛИМ

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ ҚАРОРИ

449 Электрон турдаги суғурта хизматларини кўрсатиш тартиби тўғрисидаги низомни тасдиқлаш ҳақида*

Ўзбекистон Республикаси Президентининг «Суғурта бозорини рақамлаштириш ва ҳаёт суғуртаси соҳасини ривожлантириш бўйича қўшимча чора-тадбирлар тўғрисида» 2021 йил 23 октябрдаги ПҚ–5265-сон қарори ижросини таъминлаш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг «Суғурта бозорини рақамлаштириш ва ҳаёт суғуртаси соҳасини ривожлантириш бўйича қўшимча чора-тадбирлар тўғрисида» 2021 йил 23 октябрдаги ПҚ–5265-сон қарорига мувофиқ:

суғуртанинг барча турларини (классларини) электрон шаклда амалга оширишга рухсат берилганлиги;

барча суғурта турлари бўйича суғурта полислари Молия вазирлиги ҳузуридаги Суғурта бозорини ривожлантириш агентлиги Суғурта тўловларини кафолатлаш жамғармаси билан биргаликда юритадиган ягона автоматлаштирилган ахборот тизимида рўйхатга олиниши йўлга қўйилганлиги;

суғуртанинг барча турларини (классларини) электрон шаклда сотиш ва расмийлаштириш қоидаларини, шунингдек, уларнинг ҳақиқийлигини текшириш механизмларини ўз ичига олган электрон турдаги суғурта хизматларини кўрсатиш тартибини ишлаб чиқиш белгиланганлиги;

Суғурта тўловларини кафолатлаш жамғармаси фаолиятини кенгайтириш ва бошқарув тизимини такомиллаштириш назарда тутилганлиги маълумот учун қабул қилинсин.

2. Қуйидагиларни назарда тутувчи Электрон турдаги суғурта хизматларини кўрсатиш тартиби тўғрисидаги низом 1-иловага мувофиқ тасдиқлансин:

суғуртанинг барча турларини (классларини) электрон шаклда сотиш, расмийлаштириш ва уларнинг ҳақиқийлигини текшириш суғурта қилдирувчи ва суғурталовчи ўртасида маълумотлар алмашинуви йўли билан суғурта ташкилотининг ахборот тизимида, шу жумладан, интернет жаҳон ахборот тармоғидаги ресурсида амалга оширилиши;

суғурта шартномасини тузиш учун суғурта ташкилотининг ахборот тизими орқали ариза берилиши ва тегишли маълумотларнинг автоматик тарзда тўлдирилиши;

суғурта шартномаларини муддатидан олдин бекор қилиш асослари ва тартиби;

* Ушбу қарор «Қонунчилик маълумотлари миллий базаси»да 2022 йил 6 декабрда эълон қилинган.

ахборот алмашинуви иштирокчилари ўртасида маълумотлар алмашинуви;

суғурта полислари рўйхатга олинishi ва уларнинг айланмаси бўйича мониторинг олиб бориш.

3. Суғурта тўловларини кафолатлаш жамғармаси Молия вазирлиги ҳузуридаги Суғурта бозорини ривожлантириш агентлиги ҳамда Ахборот технологиялари ва коммуникацияларини ривожлантириш вазирлиги манфаатдор вазирлик ва идоралар билан биргаликда:

2022 йил 31 декабрга қадар барча суғурта полисларини рўйхатга олувчи ва уларнинг айланмасини назорат қилувчи ягона ахборот тизими жорий этилишини ва барча суғурта компанияларининг ахборот тизимлари билан интеграция қилинишини таъминласин;

2023 йил 1 мартга қадар ички ишлар органи ходимларининг иштирокисиз расмийлаштириладиган йўл — транспорт ходисаси тўғрисидаги хабарнома онлайн тарзда юборилишини ҳамда кўриб чиқилишини амалга ошириш бўйича ягона мобил иловани ишлаб чиқсин ва ишга туширсин;

2023 йил 1 июлга қадар ягона мобил илова орқали бошқа мажбурий ва ихтиёрий суғурта турлари бўйича суғурта даъволарига оид аризалар онлайн тарзда юборилишини ҳамда кўриб чиқилишини амалиётга жорий этсин.

Бунда белгиланган чора-тадбирлар, шунингдек, мобил илованинг тўлақонли фаолиятини таъминлаш ва қўллаб-қувватлашни молиялаштириш Суғурта тўловларини кафолатлаш жамғармаси маблағлари ҳисобидан амалга оширилади.

4. Молия вазирлиги ҳузуридаги Суғурта бозорини ривожлантириш агентлиги:

Ўзбекистон Миллий ахборот агентлиги ва Ўзбекистон Миллий телерадиокомпанияси билан биргаликда суғурта хизматлари истеъмолчилари ва суғурта муносабатларининг бошқа иштирокчилари ҳуқуқлари ва қонуний манфаатлари ҳимоя қилинишини таъминлаш, аҳолининг суғурта бозорига ишончини оширишга ва жамиятда суғурта маданиятини ривожлантириш бўйича маълумотлар кенг жамоатчиликка мунтазам равишда етказилишини таъминласин;

бир ой муддатда Молия вазирлиги ҳузуридаги Суғурта бозорини ривожлантириш агентлиги ҳузуридаги «Call-марказ» хизматини ташкил этсин.

Бунда Ўзбекистон Республикаси Молия вазирлиги ҳузуридаги Суғурта бозорини ривожлантириш агентлиги ҳузуридаги «Call-марказ» хизмати фаолияти Молия вазирлиги ҳузуридаги Суғурта бозорини ривожлантириш агентлигининг бюджетдан ташқари жамғармаси маблағлари ҳисобидан молиялаштирилади.

5. Қуйидагилар:

Ўзбекистон Республикаси Президентининг 2022 йил 28 январдаги ПФ–60-сон Фармони билан тасдиқланган 2022 — 2026 йилларга мўлжалланган Янги Ўзбекистоннинг тараққиёт стратегиясини «Инсон қадрини улуғлаш ва фаол маҳалла йили»да амалга оширишга оид давлат дастурининг 136-бандига мувофиқ қишлоқ хўжалигида суғурталаш тизимини такомиллаштириш,

шу жумладан, «Қишлоқ хўжалиги таваккалчиликларини суғурталаш тўғрисида»ги қонунини қабул қилиш масаласини кўриб чиқиш белгиланганлиги;

Ўзбекистон Республикаси Президентининг «Қишлоқ хўжалиги маҳсулотлари етиштиришни молиявий қўллаб-қувватлашнинг қўшимча чора-тадбирлари тўғрисида» 2022 йил 6 октябрдаги ПҚ-387-сон қарорининг 4-бандига мувофиқ қишлоқ хўжалигини давлат томонидан молиявий қўллаб-қувватлаш ва суғурталашнинг янги механизмлари жорий этилганлиги маълумот учун қабул қилинсин.

Молия вазирлиги, Қишлоқ хўжалиги вазирлиги манфаатдор вазирлик ва идоралар билан биргаликда 2023 йил 1 июлга қадар илғор халқаро тажрибаларни атрофлича ўрганган ҳолда «Қишлоқ хўжалиги таваккалчиликларини суғурталаш тўғрисида»ги қонун лойиҳасини Вазирлар Маҳкамасига киритсин.

6. Ўзбекистон Республикаси Ҳукуматининг 2-иловага мувофиқ айрим қарорларига ўзгартириш ва қўшимчалар киритилсин.

7. Ўзбекистон Республикаси Ҳукуматининг 3-иловага мувофиқ айрим қарорлари ўз кучини йўқотган деб ҳисоблансин.

8. Ушбу қарор расмий эълон қилинган кундан эътиборан уч ой ўтгач кучга киради.

9. Мазкур қарорнинг бажарилишини назорат қилиш Ўзбекистон Республикаси Бош вазирининг молия-иқтисодиёт ва камбағалликни қисқартириш масалалари бўйича ўринбосари — иқтисодий тараққиёт ва камбағалликни қисқартириш вазири Ж.А. Қўчқоров ҳамда Ўзбекистон Республикаси молия вазири Т.А. Ишметов зиммасига юклансин.

**Ўзбекистон Республикасининг
Бош вазири**

А. АРИПОВ

Тошкент ш.,
2022 йил 5 декабрь,
694-сон

Вазирлар Маҳкамасининг
2022 йил 5 декабрдаги 694-сон қарорига
1-ИЛОВА

**Электрон турдаги суғурта хизматларини кўрсатиш тартиби
тўғрисидаги
НИЗОМ**

1-боб. Умумий қоидалар

1. Ушбу Низом Электрон турдаги суғурта хизматларини кўрсатиш ва барча суғурта полисларини рўйхатга олиш тартибини белгилайди.

2. Мазкур Низомда қуйидаги асосий тушунчалар қўлланилади:

ахборот алмашинуви иштирокчилари — суғурта қилдирувчи, суғур-

та ташкилоти, Жамғарма ва Ягона ахборот тизими билан интеграциялашган вазирликлар ва идоралар;

Жамғарма — Транспорт воситалари эгаларининг фуқаролик жавобгарлигини мажбурий суғурта қилиш бўйича тўловларни кафолатлаш жамғармаси;

суғурта полиси (E-polis) — Ягона ахборот тизими томонидан реал вақт режимда шакллантирилган серия, рақамига эга бўлган суғурта қилиш амалга оширилганлигини тасдиқловчи ҳужжат;

суғурта ташкилоти — тегишли турдаги суғуртани амалга ошириш учун лицензияга эга бўлган ва суғурта шартномасига мувофиқ суғурта товоғи (суғурта пули) тўловини амалга ошириш мажбуриятини олувчи тижорат ташкилоти бўлган юридик шахс;

суғурта ташкилотининг интернет жаҳон ахборот тармоғидаги ресурси — суғурта ташкилотининг расмий веб-сайтнинг тегишли суғурта учун мўлжалланган қисми ёки унинг мобил иловаси;

суғурта қилдирувчи — суғурта ташкилоти билан электрон суғурта шартномасини тузган ва суғурта мукофоти бўйича тўловни амалга ошириш мажбуриятини олган юридик шахс ёки муомалага лаёқатли жисмоний шахс;

Ягона ахборот тизими — манфаатдор вазирликлар ва идораларнинг ахборот тизимлари ва марказий маълумотлар базалари, жисмоний ва юридик шахслар марказий маълумотлар базалари билан интеграциялашган, суғуртанинг барча турларини (классларини) электрон шаклда амалга оширувчи ягона автоматлаштирилган ахборот тизими.

3. Суғуртанинг барча турларини (классларини) электрон шаклда сотиш, расмийлаштириш ва уларнинг ҳақиқийлигини текшириш суғурта қилдирувчи ва суғурта ташкилоти ўртасида маълумотлар алмашинуви йўли билан, суғурта ташкилотининг ахборот тизимида, шу жумладан, интернет жаҳон ахборот тармоғидаги ресурсида суғурта шартномасини тузишда, уни Ягона ахборот тизимида рўйхатга олиш ва суғурта полисига ноёб рақам бериш орқали амалга оширилади.

Суғурта ташкилотларининг интернет жаҳон ахборот тармоғи ресурслари рўйхати Ўзбекистон Ягона суғурта порталида жойлаштирилади.

4. Шахсий маълумотларни қайта ишлашда ахборот алмашинуви иштирокчилари шахсий маълумотлар ва суғурта сири деб таснифланган маълумотларни уларга ноқонуний ёки тасодифий кириш, йўқ қилиш, ўзгартириш, блокировка қилиш, нусха олиш, тақдим этиш ва тарқатишдан, шунингдек, бошқа ноқонуний ҳаракатлардан ҳимоя қилиш учун зарур ҳуқуқий, ташкилий ва техник чораларни кўришлари шарт.

5. Суғурта шартномаларини Ягона ахборот тизими орқали расмийлаштириш суғурта ташкилотлари учун мажбурий ҳисобланади.

Ушбу мажбуриятнинг бажарилиши устидан назорат қилиш Ўзбекистон Республикаси Молия вазирлиги ҳузуридаги Суғурта бозорини ривожлантириш агентлиги (кейинги ўринларда — Суғурта бозорини ривожлантириш агентлиги) томонидан амалга оширилади.

6. Суғурта шартномаларини расмийлаштириш, суғурта полисларини

рўйхатга олиш, уларнинг ҳақиқийлигини текшириш ҳамда суғурта даъволарини кўриб чиқиш ушбу Низомга иловадаги* схемага мувофиқ амалга оширилади.

2-боб. Суғурта шартномасини расмийлаштириш тартиби

7. Суғурта шартномаси Ягона ахборот тизимидан суғурта қилдирувчига суғурта полиси шакллантирилганлиги ҳақида хабар бериш ва суғурта полисини юклаб олиш учун ҳавола юбориш йўли билан тузилади.

8. Суғурта шартномасининг амал қилиш муддати суғурта шартномаси ва қонунчилик ҳужжатларига мувофиқ белгиланади.

9. Агар суғурта полисида суғурта амал қилиши бошланишининг бошқача муддати назарда тутилмаган бўлса, суғурта шартномаси кучга кирганидан кейин юз берган суғурта ҳодисаларига нисбатан татбиқ этилади.

10. Суғурта қилдирувчи суғурта ташкилотини эркин танлаш ҳуқуқига эга.

11. Суғурта ташкилоти суғурта қилдирувчига мазкур Низомнинг 28-бандида назарда тутилган мажбуриятларни таъминлаган ҳолда суғурта шартномасини тузиш имкониятини яратиши зарур.

12. Суғурта шартномасини тузиш учун суғурта ташкилотининг ахборот тизимида, шу жумладан, интернет жаҳон ахборот тармоғидаги ресурсида аризани шакллантиришда қуйидагилардан фойдаланилади:

а) идентификаторлар:

жисмоний шахслар — жисмоний шахснинг шахсий идентификация рақами;

юридик шахслар — солиқ тўловчининг идентификация рақами;

транспорт воситалари — транспорт воситасининг давлат рақами белгиси ва рўйхатдан ўтказилганлиги тўғрисидаги гувоҳноманинг серияси ва рақами;

кўчмас мулкнинг кадастр рақами;

б) маълумотлар:

жисмоний шахсларнинг шахсини тасдиқловчи ҳужжатлар тўғрисида маълумот;

кредит реестридан кўчирма;

ойлик даромади ёки иш ҳақи ҳақида;

гаров реестридан кўчирма;

ижро ҳужжатлари бўйича мавжуд қарздорлик;

ҳайдовчилар томонидан содир этилган йўл ҳаракати қоидабузарликлари тўғрисида.

Бунда тегишли маълумотлар давлат ахборот базаларида мавжуд бўлганда автоматик тарзда тўлдирилади.

Аризани шакллантириш учун ҳар бир суғурта тури (класси) бўйича қонунчиликка мувофиқ ушбу бандда назарда тутилган маълумотларга қўшимча равишда тақдим этиладиган маълумотлар тартиби ариза шаклида кўрсатилади.

13. Давлат маълумотлар базаларида суғурта шартномасини тузиш учун зарур бўлган маълумотлар ёки давлат маълумотлар базалари билан техник

* Илова «Қонунчилик маълумотлари миллий базаси»да эълон қилинган.

уланиш имконияти мавжуд бўлмаган ҳолларда аризада кўрсатилган маълумотлар Ягона ахборот тизимида суғурта қилдирувчи (суғурталанган шахс) нинг аввал тузилган ва амалдаги суғурта шартномаларидаги маълумотлар билан таққосланади.

14. Суғурта қилдирувчи (суғурталанган шахс) томонидан аввал тузилган ва амалдаги суғурта шартномалари тўғрисидаги маълумотлар Ягона ахборот тизимида ҳамда давлат маълумотлар базаларида мавжуд бўлмаганда, суғурта ташкилоти аризага илова қилинган хужжатларнинг электрон ёки сканер қилинган нусхаларидаги маълумотларни текширади.

Суғурта ташкилоти томонидан юборилган аризадаги маълумотларнинг тўлиқлиги ва тўғрилиги бир иш куни ичида текширилади. Агар аризадаги маълумотлар нотўғрилиги аниқланса, маълумотларни қайта тўғриланиши тўғрисида суғурта қилдирувчига хабарнома юборилади. Агар суғурта қилдирувчи томонидан ариза берилган санадан бошлаб 24 соат давомида маълумотлар қайта текширилмаса ва/ёки тўғриланмаса, унда суғурта ташкилоти суғурта шартномасини расмийлаштириш, қўшимча киритиш ва бекор қилиш имконияти йўқлиги тўғрисида суғурта ташкилотининг интернет жаҳон ахборот тармоғидаги ресурси ёки SMS-хабар орқали суғурта қилдирувчини хабардор қилади.

15. Аризадаги маълумотлар тўлиқлиги ва тўғрилиги текширилгач, суғурта ташкилоти ушбу маълумотларни ўзининг ахборот тизими орқали Ягона ахборот тизимида суғурта шартномасини рўйхатга олиш учун юборади. Ягона ахборот тизими суғурта шартномасини рўйхатга олиш ва суғурта полисини шакллантириш учун зарур бўлган маълумотларнинг тўлиқлигини текширади ва суғурта ташкилотига суғурта шартномаси рўйхатга олинганлиги ва унга берилган ноёб рақами тўғрисида дарҳол хабар юборади.

Суғурта полисида унинг ҳақиқий эканлигини текшириш имконини берувчи QR-код кўрсатилиши лозим.

16. Суғурта ташкилоти суғурта шартномаси Ягона ахборот тизимида рўйхатга олинганлиги тўғрисидаги хабарни олгандан сўнг суғурта қилдирувчига суғурта мукофоти тўловини амалга ошириши мумкинлиги тўғрисида хабар беради.

17. Суғурта қилдирувчи суғурта мукофотини тўлаши мумкинлиги тўғрисидаги хабарномани олгандан сўнг 3 календарь кун мобайнида суғурта мукофотини нақд пулда ёки нақдсиз тўлайди.

Суғурта мукофоти суғурта шартномасида назарда тутилган тўловдан камроқ миқдорда тўланган бўлса, суғурта ташкилоти суғурта мукофотининг тўланмаган қисми суғурта қилдирувчи томонидан 3 календарь кун муддатда тўланиши зарурлиги тўғрисида дарҳол хабарнома юборади.

Суғурта мукофоти миқдори ортиқча тўланган тақдирда, суғурта ташкилоти унинг суғурта қилдирувчига 3 календарь кун ичида қайтарилишини таъминлайди ва тегишли хабарни юборади.

18. Суғурта қилдирувчи томонидан суғурта мукофоти тўлангандан сўнг суғурта қилдирувчига ушбу Низомнинг 26-бандида белгиланган тартибда суғурта полиси берилади.

19. Суғурта қилдирувчи ўзи томонидан суғурта полисини расмийлаштириш учун суғурта ташкилотига тақдим этилаётган маълумотлар ва ҳужжатларнинг ҳақиқийлиги учун жавобгар ҳисобланади.

3-боб. Суғурта шартномасини муддатидан олдин бекор қилиш тартиби

20. Суғурта шартномаси амал қиладиган даврда суғурта шартномаси тузиш тўғрисидаги аризада кўрсатилган маълумотлар ўзгарган тақдирда амалдаги суғурта шартномасининг амал қилиши муддатидан олдин бекор қилиниши ва янги суғурта шартномаси расмийлаштирилиши шарт.

21. Суғурта шартномасининг амал қилиши қўйидаги ҳолларда муддатидан олдин бекор қилинади:

юридик шахс тугатилганда ёки қайта ташкил этилганда;

суғурта қилдирувчи — жисмоний шахс вафот этганда;

суғурта шартномаси суд қарорига кўра ҳақиқий эмас деб эътироф этилганда;

суғурта шартномаси тузиш тўғрисидаги аризада кўрсатилган маълумотлар ўзгарган тақдирда.

Ҳар бир суғурта турининг (класснинг) ўзига хос хусусиятларидан келиб чиққан ҳолда қонунчиликка мувофиқ ушбу бандда назарда тутилганидан бошқача асослар ҳам белгиланиши мумкин.

22. Суғурта шартномаси муддатидан олдин бекор қилинган тақдирда, суғурта мукофотининг бир қисми суғурта амал қилган вақтга мутаносиб равишда, агар шартномада бошқача тартиб назарда тутилмаган бўлса, қайтарилади.

23. Суғурта қилдирувчига (унинг қонуний вакилларига, меросхўрларига, ҳуқуқий ворисларига) суғурта мукофотининг бир қисмини қайтариш суғурта қилдирувчи (унинг қонуний вакиллари, меросхўрлари, ҳуқуқий ворислари) тегишли тартибда мурожаат қилган кундан бошлаб 3 календарь кун мобайнида амалга оширилади.

Бунда суғурта қилдирувчига қайтарилиши лозим бўлган суғурта мукофотининг бир қисми суғурта қилдирувчининг аризасига мувофиқ янги расмийлаштирилган суғурта полиси бўйича суғурта мукофоти ҳисобига ўтказилиши мумкин.

4-боб. Суғурта полисларини рўйхатга олиш ва уларнинг айланмасини назорат қилиш

24. Суғурта полисининг амал қилиш муддати, қоида тариқасида, бир йил этиб белгиланади. Ҳар бир суғурта турининг (классларнинг) ўзига хос хусусиятларидан келиб чиққан ҳолда ушбу Низомда назарда тутилганидан бошқача муддатлар ҳам белгиланиши мумкин.

25. Суғурта полиси, суғурта шартномада бошқа ҳоллар назарда тутилмаган бўлса, суғурта мукофоти ёки биринчи бадал тўланган пайтда кучга киради.

26. Суғурта шартномаси ягона ахборот тизимида рўйхатга олингандан ва суғурта қилдирувчи томонидан суғурта мукофоти тўлангандан сўнг суғурта ташкилоти бу тўғрисида Ягона ахборот тизимига хабар юборади.

Ягона ахборот тизими суғурта шартномасида кўрсатилган маълумотлар асосида суғурта полисининг тегишли серияси, рақамини шакллантиради ва суғурта ташкилотининг ахборот тизимига хабар беради ҳамда ушбу Низомнинг 31-бандида белгиланган тартибда суғурта қилдирувчига хабарномани юборади.

27. Суғурта полисларининг айланмаси Суғурта бозорини ривожлантириш агентлиги Жамғарма билан биргаликда юритадиган Ягона ахборот тизимида рўйхатга олинади ва назорат қилинади.

5-боб. Ахборот алмашинуви иштирокчилари ўртасида маълумотлар алмашинуви

28. Суғурта қилдирувчи ва суғурта ташкилоти ўртасида маълумотлар алмашишда суғурта ташкилоти қуйидагиларни таъминлашга мажбур:

суғурта ташкилотининг ахборот тизими, шу жумладан, интернет жаҳон ахборот тармоғидаги ресурсида суғурта шартномасини тузиш имкониятидан туну кун тўлиқ фойдалана олиш;

мазкур Низомнинг 12-бандида назарда тутилган суғурта шартномасини тузиш ҳақидаги аризани шакллантириш имкониятини яратиш;

суғурта ташкилотининг интернет жаҳон ахборот тармоғидаги ресурсида оммавий оферта суғурта шартномасини тузиш таклифини, суғурта қоидаларини жойлаштириш;

суғурта шартномасини тузиш тўғрисидаги аризада суғурта қилдирувчи томонидан аризани шакллантириш учун зарур бўлган ҳарфлар, рақамлар ва белгиларнинг минимал ҳамда максимал сони ва форматига мувофиқлигини автоматик тарзда текшириш ва агар аризадаги ёзувлар мос келмаса, номувофиқ жойларни текшириш ва тўғрилаш зарурати тўғрисида хабар бериш;

суғурта қоидаларига мувофиқ суғурта қилдирувчи томонидан аризада кўрсатилган маълумотларни тасдиқловчи ҳужжатларнинг электрон ёки сканер қилинган нусхаларини илова қилиш;

суғурта шартномаси тузишда Ягона ахборот тизими билан интеграциялашган вазирликлар ва идоралар ахборот тизимларидан мазкур Низомнинг 12-бандида назарда тутилган идентификатор орқали олинган маълумотларни аризада автоматик тарзда тўлдириш;

суғурта шартномаси тузилганлиги тўғрисидаги маълумотни рўйхатдан ўтказиш ва унинг ноёб рақамини олиш учун Ягона ахборот тизимига юбориш;

суғурта қилдирувчи томонидан суғурта мукофоти тўлангандан сўнг суғурта полисининг серия ва рақамини олиш учун ушбу маълумотни Ягона ахборот тизимига юбориш;

Ягона ахборот тизимига йўналтириш орқали суғурта полиси ҳақиқийлигини текшириш имкониятини яратиш;

суғурта мукофоти миқдори, шунингдек, қонунчиликда белгиланган

суғурта мукофоти бўйича тақдим этиладиган сийловни ҳисобга олган ҳолда суғурта мукофотининг миқдори билан таништириш;

суғурта қилдирувчи томонидан танланган суғурта маҳсулоти учун суғурта шартномалари, шу жумладан, суғурта суммаси, суғурта тарифларини ҳисоблашда ишлатиладиган коэффициентлар тўғрисидаги ва суғурта шартномасини тузиш учун зарур бўлган бошқа маълумотларни ўз ичига олган суғурта қоидалари ва оммавий оферта билан суғурта шартномасини расмийлаштиришдан ва/ёки суғурта мукофотини тўлашдан олдин таништириш;

суғурта мукофотини нақд ёки нақдсиз тўлаш, шу жумладан, суғурта ташкилотининг тўлов реквизитлари, ҳисобварағи, тўлов муддати ва суғурта полисининг кучга кириши тартиби ва амал қилиш муддати кўрсатилган тўлов ҳисобини ўз ичига олган ҳисоб-фактурани автоматик тарзда расмийлаштириш;

суғурта мукофоти суғурта қилдирувчи томонидан тўланмаса, суғурта ташкилоти суғурта қилдирувчига суғурта шартномаси тузилмаганлиги тўғрисида хабар қилинишини таъминлаш;

суғурта қилдирувчига суғурта шартномаси тузилганлиги ва суғурта полисининг серияси ва рақами тўғрисида суғурта ташкилоти томонидан мазкур Низомнинг 32-бандида назарда тутилган хабар бериш усулини танлаш.

29. Ҳодиса содир бўлганлиги тўғрисида билдиришнома юбориш, етказилган зарар миқдорини аниқлаш, суғурта тўловларини амалга ошириш учун жабрланувчи ёки суғурта қилдирувчи суғурта шартномасида белгиланган ҳужжатларнинг электрон ёки сканерланган нусхаларини суғурта ташкилотига интернет жаҳон ахборот тармоғи орқали юборишга ҳақли.

30. Агар ҳодиса содир бўлганлигини ва суғурта қилдирувчи томонидан етказилган зарар миқдорини тасдиқловчи ҳужжатлар етарли бўлмаса, суғурта ташкилоти бу тўғрисида ушбу ҳужжатлар олинган кундан бошлаб уч иш кўни ичида етишмаётган ва (ёки) нотўғри расмийлаштирилган ҳужжатларнинг тўлиқ рўйхатини кўрсатган ҳолда жабрланувчи ёки суғурта қилдирувчининг электрон почта манзилига (мавжуд бўлса) ёки кўрсатилган телефон рақамига SMS-хабар орқали маълумот юбориши керак.

31. Тақдим этилган ҳужжатларнинг тўлиқ рўйхати ва қабул қилинган санаси тўғрисида электрон маълумотнома ариза берувчига у кўрсатган электрон почта манзилига (мавжуд бўлса) юборилади ва (ёки) суғурта ташкилотининг интернет жаҳон ахборот тармоғидаги ресурсидаги ариза берувчининг шахсий кабинетида кўрсатилади.

6-боб. Суғурта қилдирувчига хабарномани юбориш ва унинг мазмунига қўйиладиган талаблар

32. Ягона ахборот тизими томонидан суғурта қилдирувчига электрон суғурта шартномаси тузилганлиги, бекор қилинганлиги ёки муддатидан олдин тугатилганлиги, суғурта полисининг серияси ва рақами, суғурта полиси бўйича суғурта тўлови тўланганлиги тўғрисидаги хабарнома суғурта қил-

дирувчининг аризада кўрсатилган телефон рақамига SMS-хабар шаклида ва (ёки) электрон почта манзилига (мавжуд бўлса) электрон хабарнома шаклида юборилади.

Бунда суғурта қилдирувчи хабарнома юборишнинг бир ёки бир нечта усулини танлаш ҳуқуқига эга.

33. Суғурта ташкилотидан суғурта шартномаси тузилганлиги ва суғурта мукофоти тўланганлиги тўғрисида маълумот олгандан сўнг Ягона ахборот тизимидан суғурта қилдирувчининг аризада кўрсатилган телефон рақамига SMS-хабар шаклида ва (ёки) электрон почта манзилига қуйидагиларни ўз ичига олган хабарнома юборилади:

- суғурта ташкилотининг номи;
- суғурта мукофоти миқдори;
- суғурта полисининг амал қилиш муддати;
- суғурта полисининг ноёб рақами;
- суғурта объекти ва предмети;

Ягона ахборот тизимида суғурта полисининг ҳақиқийлигини текшириш учун ҳавола.

Суғурта қилдирувчи Ягона ахборот тизимининг тегишли қисмига ушбу ҳавола орқали ўтиб, суғурта полисини юклаб олиши мумкин.

34. Суғурта шартномаси муддатидан олдин бекор қилинганлиги тўғрисида электрон ёки SMS-хабар шаклида юборилган маълумот қуйидагиларни ўз ичига олади:

суғурта шартномасининг муддатидан олдин бекор қилинганлиги бўйича матн ва санаси;

- суғурта ташкилотининг номи;
- суғурта полисининг серияси ва рақами;
- суғурта объекти ва предмети.

35. Суғурта шартномаси бўйича суғурта тўлови тўланганлиги тўғрисидаги электрон ёки SMS-хабар шаклида юборилган маълумот қуйидагиларни ўз ичига олади:

- суғурта ташкилотининг номи;
- суғурта полисининг серияси ва рақами;
- суғурта объекти ва предмети;
- суғурта тўлови амалга оширилган сана ва суммаси.
- суғурта тўлови тўланганлиги тўғрисидаги тегишли маълумот.

7-боб. Суғурта полисининг ҳақиқийлигини текшириш

36. Суғурта ташкилоти, суғурта қилдирувчи ва суғурта бўйича мажбуриятнинг бажарилишини назорат қилиш бўйича ваколатли давлат органларининг ахборот тизимларини Ягона ахборот тизими билан интеграциялаш ва (ёки) Ягона ахборот тизимида суғурта полисининг серияси, рақами ва суғурта объекти идентификаторини киритиш ёки электрон қурилмада махсус кодни ўқиб олиш орқали суғурта полисининг ҳақиқийлигини текшириш амалга оширилади.

8-боб. Ягона ахборот тизимида ахборот алмашинувини тўхтатиш асослари

37. Суғурта ташкилоти лицензиясининг амал қилишини тўхтатиб туриш, тугатиш ёки бекор қилиш тўғрисида қарор қабул қилинган ва (ёки) Ягона ахборот тизими доирасида Жамғарма ва суғурта ташкилоти ўртасида маълумот алмашиш тўғрисидаги ёзма битим бекор қилинган тақдирда:

Жамғарма Ягона ахборот тизими билан суғурта ташкилотининг ахборот тизими ўртасида электрон суғурта шартномасини тузиш учун зарур бўлган маълумот алмашинувини мутаносиб равишда тўхтатади;

Жамғарма ўзининг расмий веб-сайтида ушбу суғурта ташкилоти билан электрон суғурта шартномаларини тузиш мумкин эмаслиги ва бунинг сабаблари тўғрисидаги маълумотни жойлаштиради ҳамда суғурта ташкилотининг интернет жаҳон ахборот тармоғидаги ресурси билан ахборот алмашинувини мутаносиб равишда тўхтатади;

Суғурта бозорини ривожлантириш агентлиги Ўзбекистон ягона суғурта порталига ушбу суғурта ташкилоти билан суғурта шартномасини тузиш мумкин эмаслиги ва суғурта ташкилотининг интернет жаҳон ахборот тармоғидаги ресурси билан ахборот алмашинуви тўхтатилганлиги (вақтинча тўхтатганлиги) тўғрисидаги маълумотни жойлаштиради ҳамда суғурта ташкилотининг интернет жаҳон ахборот тармоғидаги ресурси билан ахборот алмашинувини мутаносиб равишда тўхтатади;

суғурта ташкилоти ўзининг интернет жаҳон ахборот тармоғидаги ресурсида суғурта шартномасини тузиш мумкин эмаслиги ва унинг сабаблари тўғрисидаги маълумотни жойлаштиради ва электрон турдаги суғурта хизматларини кўрсатишни мутаносиб равишда тўхтатади.

38. Электрон турдаги суғурта хизматларини кўрсатишнинг ҳар қандай босқичида хизмат кўрсатиш имкониятидан фойдаланиш чекланганлиги аниқланганда, мазкур ҳолат Жамғарма томонидан ўрганилиб, хизмат кўрсатиш имконияти тўлиқ тиклангунга қадар суғурта ташкилотининг ахборот тизими ҳамда Жамғарма ягона ахборот тизими ўртасида интеграция тўлиқ ёки қисман тўхтатилади.

9-боб. Яқунловчи қоидалар

39. Мажбурий суғуртанинг ҳар қандай турида мажбурий суғурта бўйича тегишли лицензияси мавжуд суғурта ташкилоти томонидан мажбурий суғурта шартномаларини (суғурта полисларини) расмийлаштириш сунъий равишда рад этилиши суғурта фаолияти тўғрисидаги қонунчилик ҳужжатларини бузиш ҳисобланади.

40. Суғурта қилдирувчи томонидан электрон турдаги суғурта хизматларидан фойдаланиш орқали расмийлаштирилган суғурта шартномалари (суғурта полислари) бўйича суғурта ташкилотлари томонидан воситачилик тақдирлаш тўловларини тўлаш тақиқланади.

41. Ушбу Низом талабларини бузганликда айбдор бўлган шахслар қонунчилик ҳужжатларида белгиланган тартибда жавоб берадилар.

Вазирлар Маҳкамасининг
2022 йил 5 декабрдаги 694-сон қарорига
2-ИЛОВА

Ўзбекистон Республикаси Ҳукуматнинг айрим қарорларига киритилаётган ўзгартириш ва қўшимчалар

1. Вазирлар Маҳкамасининг «Транспорт воситалари эгаларининг фуқаролик жавобгарлигини мажбурий суғурта қилиш тўғрисида»ги Ўзбекистон Республикаси Қонунини амалга ошириш чора-тадбирлари ҳақида» 2008 йил 24 июндаги 141-сон қарорига:

а) 1-иловада:

1-банддаги «тўловларни кафолатлаш мақсадида» сўзлари «тўловларни кафолатлаш ҳамда барча суғурта турлари бўйича Ягона ахборот тизимини шакллантириш ва юритиш мақсадида» сўзлари билан алмаштирилсин;

5-бандда:

тўртинчи хатбоши қуйидаги таҳрирда баён этилсин:

«барча мажбурий ва ихтиёрий суғурта, шу жумладан, ушбу суғурта турлари бўйича суғурта қилиш шартномалари тўғрисидаги маълумотлардан иборат бўлган, суғурта ҳодисалари тўғрисидаги Ягона ахборот тизимини, суғурта қилдирувчилар ва жабрланганлар тўғрисидаги шахсий маълумотларни шакллантириш, суғурта сирлари тўғрисидаги қонун ҳужжатларида белгиланган талабларни таъминлаган ҳолда ваколатли давлат органлари ва суғурталовчилар билан Жамғарма ўртасида кўрсатиб ўтилган маълумотларни айирбошлашни ташкил этиш;»;

олтинчи хатбоши қуйидаги таҳрирда баён этилсин:

«Е-полислар, суғурта ҳодисалари, суғурта қилдирувчилар ва жабрланувчилар тўғрисидаги шахсий маълумотлардан иборат бўлган, Е-полисни сотиш ва расмийлаштириш бўйича ҳамда барча суғурта турлари бўйича Ягона ахборот тизимини шакллантириш ва юритиш, барча мажбурий ва ихтиёрий суғурта турлари бўйича мажбуриятларнинг бажарилишини назорат қилиш бўйича ваколатли давлат органлари билан маълумотлар алмашинувини ташкил этиш;»;

6-бандда:

қуйидаги мазмундаги тўртинчи — саккизинчи хатбошилар қўшилсин:

«тегишли вазирликлар ва идоралар ҳамда суғурталовчилар ўртасида барча мажбурий ва ихтиёрий суғурта турларига оид маълумотлар алмашувини таъминлашни мувофиқлаштиради;

барча мажбурий ва ихтиёрий суғурта турларини амалга ошириш ва суғурта ҳодисаларини ҳал этиш билан боғлиқ интерактив хизматларни кўрсатади ҳамда ахборот тизимларини яратади;

электрон турдаги суғурта хизматларини кўрсатишнинг ҳар қандай босқичида хизмат кўрсатиш имкониятидан фойдаланишнинг чекланган ҳолати аниқланганда, мазкур ҳолат Жамғарма томонидан ўрганилиб, хизмат кўрсатиш имконияти тўлиқ тиклангунга қадар Суғурта ташкилотининг ахборот тизими ҳамда Жамғарма ягона ахборот тизими ўртасида интеграция тўлиқ ёки қисман тўхтатилади.

барча мажбурий ва ихтиёрий суғурта турлари бўйича суғурта статистикасини шакллантиради;

барча мажбурий ва ихтиёрий суғурта турлари бўйича ахборот-таҳлил фаолиятини амалга оширади, шу жумладан, буюртма асосида тўлов эвазига»; тўртинчи — тўққизинчи хатбошилар тегишлича тўққизинчи — ўн тўртинчи хатбошилар деб ҳисоблансин;

ўнинчи ва ўн учинчи хатбошилардаги «мажбурий суғурта қилиш» сўзлари «барча мажбурий ва ихтиёрий суғурта турлари» сўзлари билан алмаштирилсин;

7-бандда:

қуйидаги мазмундаги учинчи хатбоши қўшилсин:

«барча мажбурий ва ихтиёрий суғурта турлари бўйича ахборот-таҳлил фаолиятини амалга ошириш, шу жумладан, буюртма асосида тўлов эвазига»;

учинчи ва тўртинчи хатбошилар тегишлича тўртинчи ва бешинчи хатбошилар деб ҳисоблансин;

8-банднинг бешинчи хатбошисидаги «мажбурий суғурта қилиш» сўзлари «барча мажбурий ва ихтиёрий суғурта турлари» сўзлари билан алмаштирилсин;

9-банд қуйидаги таҳрирда баён этилсин:

«9. Жамғарманинг мол-мулки:

транспорт воситалари эгаларининг фуқаролик жавобгарлигини мажбурий суғурта қилиш фаолияти билан шуғулланувчи суғурталовчиларнинг бир йўла ва календарь тўланадиган бадаллари;

Ягона ахборот тизимидан фойдаланиш ва ушбу тизим доирасида ўзаро ахборот алмашишни ташкил қилиш учун бир йўла тўланадиган ҳамда тизимнинг тўлақонли фаолиятини таъминлаш ва қўллаб-қувватлашни молиялаштириш бўйича даврий тўловлар;

Жамғарма томонидан жабрланувчига етказилган зарар учун жавобгар шахсларга нисбатан регресс ва суброгация ҳуқуқини амалга оширишдан тушган маблағлар;

Жамғарманинг пул маблағларини жойлаштиришдан олинадиган даромадлар;

буюртма асосида тўлов эвазига барча мажбурий ва ихтиёрий суғурта турлари бўйича ахборот-таҳлил фаолиятини амалга оширишдан олинган даромадлар;

қонунчилик ҳужжатларида тақиқланмаган бошқа тушумлар ҳисобига шаклланади»;

10-банд қуйидаги таҳрирда баён этилсин:

«10. Транспорт воситалари эгаларининг фуқаролик жавобгарлигини мажбурий суғурта қилиш фаолияти билан шуғулланувчи суғурталовчиларнинг Жамғармага бир йўла тўланадиган бадали Жамғармага бадал киритиш кунда суғурталовчи устав фондининг қонунчилик ҳужжатларида белгиланган энг кам миқдорининг 0,1 фоизини ташкил этади.

Транспорт воситалари эгаларининг фуқаролик жавобгарлигини мажбу-

рий суғурта қилиш фаолияти билан шуғулланувчи суғурталовчиларнинг Жамғармага тўланадиган календарь бадаллари суғурталовчилар томонидан йилнинг ҳар чорагида Жамғармага ўтказиладиган пул маблағларидан иборат бўлади. Календарь бадал миқдори суғурталовчи билан тузилган мажбурий суғурта шартномалари бўйича умумий суғурта суммаси ҳисобот чорагида ўсиши ҳажмидан келиб чиқиб махсус ваколатли давлат органи билан келишув бўйича Жамғарманинг кузатув кенгаши томонидан белгиланади.

Тўланган календарь бадаллар суммаси Жамғарманинг кузатув кенгаши томонидан белгиланган миқдорга етганда суғурталовчилар томонидан календарь бадаллар тўлаш махсус ваколатли давлат органи билан келишган ҳолда мажбурий суғурта шартномалари бўйича умумий суғурта суммасидан келиб чиқиб тўхтатиб турилади. Мажбурий суғурта шартномалари бўйича жами суғурта суммаси ўзгарган тақдирда, суғурталовчи томонидан Жамғармага тўланган календарь бадаллар суммаси қайта ҳисобланади»;

11-банд қуйидаги таҳрирда баён этилсин:

«11. Суғурталовчининг Жамғармага Ягона ахборот тизимидан фойдаланиш ва ушбу тизим доирасида ўзаро ахборот алмашишни ташкил қилиш учун тўланадиган бир йўла бадали Жамғармага бадал киритиш кунда суғурталовчи устав фондининг қонунчилик ҳужжатларида белгиланган энг кам миқдорининг 0,1 фоизини ташкил этади.

Бунда мазкур бадал Жамғарма билан унга аъзолик тўғрисидаги ёзма битим тузган суғурталовчилар томонидан амалга оширилмайди.

Суғурталовчининг Ягона ахборот тизимининг тўлақонли фаолиятини таъминлаш ва қўллаб-қувватлашни молиялаштириш бўйича Жамғармага даврий тўловлари суғурталовчилар томонидан йилнинг ҳар чорагида Жамғармага ўтказиладиган пул маблағларидан иборат бўлади.

Даврий тўлов миқдори махсус ваколатли давлат органи билан келишув бўйича Жамғарманинг кузатув кенгаши томонидан белгиланади.»;

24 ва 25-бандлар қуйидаги таҳрирда баён этилсин:

«24. Суғурталовчи томонидан Жамғарма ва суғурталовчи ўртасида тузилган битимларда назарда тутилган Жамғарма олдидаги мажбуриятлар мунтазам равишда (ҳисобот даврида икки ва ундан кўп маротаба) бажарилмаган тақдирда, шу жумладан, Жамғарманинг бу ҳақидаги махсус ваколатли давлат органига тақдим этган маълумотига асосан:

махсус ваколатли давлат органи томонидан ушбу суғурталовчи мажбуриятлар бажарилиши лозимлиги тўғрисида огоҳлантирилади;

суғурталовчи огоҳлантириш сабабларини бартараф этмаган тақдирда, махсус ваколатли давлат органининг кўрсатмасига асосан Жамғарма томонидан суғурталовчининг Ягона ахборот тизими билан ахборот алмашинуви тўхтатилади;

махсус ваколатли давлат органи томонидан Ягона ахборот тизими билан ахборот алмашинуви тўхтатилишига сабаб бўлган ҳолатлар бартараф этилганлиги тўғрисида хабар берилган тақдирда, ахборот алмашинуви қайта тикланади;

Жамғарманинг кузатув кенгаши махсус ваколатли давлат органи билан

келишган ҳолда суғурталовчи ва Жамғарма ўртасида тузилган битимни бекор қилиш тўғрисида қарор қабул қилиши мумкин.

25. Суғурта қилиш бўйича фаолиятнинг ихтиёрий тўхтатилиши муносабати билан Жамғарма билан тузилган битимлар ихтиёрий бекор қилинганда, шунингдек, Жамғарма олдидаги мажбуриятлар бажармаганлиги учун суғурталовчи билан тузилган битимлар бекор қилинган тақдирда, суғурталовчи суғурта қилиш бўйича илгари тузилган ёзма битимлар бўйича ўз мажбуриятларини бажариши шарт»;

б) 2-илова* қўйидаги таҳрирда баён қилинсин:

в) 3-илованинг матни* қўйидаги таҳрирда баён этилсин:

2. Ўзбекистон Республикаси Вазирлар Маҳкамасининг 2021 йил 15 октябрдаги 645-сон қарори билан тасдиқланган Ўзбекистон Республикаси ички ишлар органлари тизимига ахборот технологияларини жорий этиш бўйича чора-тадбирлар дастури 50-позициясининг амалга ошириш босқичларидаги 2-бандни амалга ошириш муддатидаги «2022 йил» сўзлари «2023 йил» сўзлари билан алмаштирилсин.

3. Вазирлар Маҳкамасининг 2022 йил 21 февралдаги 80-сон қарори билан тасдиқланган Махсус электрон тизим орқали айрим фаолият турларини лицензиялаш тартиби тўғрисида ягона низомга 6-иловада:

а) 5-бандда:

«б» кичик бандга қўйидаги мазмундаги иккинчи хатбоши қўшилсин:

«суғурталовчининг Транспорт воситалари эгаларининг фуқаролик жавобгарлигини мажбурий суғурта қилиш бўйича тўловларни кафолатлаш жамғармаси билан Ягона ахборот тизимидан фойдаланиш ва ушбу тизим доирасида ўзаро ахборот алмашиш тўғрисида ёзма битимнинг мавжуд бўлиши — мажбурий ва ихтиёрий суғурта фаолияти билан шуғулланувчи суғурталовчилар учун (транспорт воситалари эгаларининг фуқаролик жавобгарлигини мажбурий суғурта қилувчи суғурталовчилар бундан мустасно);»;

иккинчи хатбоши учинчи хатбоши деб ҳисоблансин;

б) 9-бандда:

қўйидаги мазмундаги олтинчи-еттинчи хатбошилар қўшилсин:

«е) суғурталовчининг Суғурта полиси маълумотларини юритиш маркази билан Ягона ахборот тизимидан фойдаланиш ва ушбу тизим доирасида ўзаро ахборот алмашиш тўғрисидаги ёзма битимнинг мавжудлиги.»;

ж) Электрон турдаги суғурта хизматларини кўрсатиш тартиби тўғрисидаги низом талабларига асосан электрон суғурта хизматлари кўрсатилишини таъминлаш»;

олтинчи — ўн еттинчи хатбошилар тегишлича саккизинчи — ўн тўққизинчи хатбошилар деб ҳисоблансин.

* 2-3-иловалар «Қонунчилик маълумотлари миллий базаси»да эълон қилинган.

Вазирлар Маҳкамасининг
2022 йил 5 декабрдаги 694-сон қарорига
3-ИЛОВА

**Ўзбекистон Республикаси Ҳукуматининг ўз кучини йўқотган
деб эътироф этилаётган қарорлари
РЎЙХАТИ**

1. Вазирлар Маҳкамасининг «Электрон турдаги суғурта хизматларини кўрсатиш тартибини такомиллаштириш бўйича қўшимча чора-тадбирлар тўғрисида» 2020 йил 14 декабрдаги 780-сон қарорининг 4-банди, шунингдек, қарорга илова.

2. Вазирлар Маҳкамасининг «Ўзбекистон Республикаси Ҳукуматининг айрим қарорларига ўзгартиришлар киритиш тўғрисида (Ўзбекистон Республикасининг «Норматив-ҳуқуқий ҳужжатлар тўғрисида» 2021 йил 20 апрелдаги ЎРҚ–682-сон Қонуни)» 2022 йил 4 апрелдаги 153-сон қарорига илованинг 958-банди.

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИНИНГ
ҚАРОРИ**450 Даволаш-профилактика муассасаларининг илмий даражага эга бўлган ходимларига ҳар ойлик қўшимча ҳақ тўлаш тартиби тўғрисидаги низомни тасдиқлаш ҳақида***

Ўзбекистон Республикаси Президентининг «Тиббиёт муассасалари ходимларини моддий қўллаб-қувватлаш ҳамда рағбатлантиришни кучайтириш чора-тадбирлари тўғрисида» 2022 йил 17 майдаги ПФ–136-сон Фармони ижросини таъминлаш, шунингдек, давлат тиббиёт муассасаларида илмий даражага эга бўлган тиббиёт ходимларининг фаолиятини муносиб рағбатлантириш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг «Тиббиёт муассасалари ходимларини моддий қўллаб-қувватлаш ҳамда рағбатлантиришни кучайтириш чора-тадбирлари тўғрисида» 2022 йил 17 майдаги ПФ–136-сон Фармонининг 4-бандига мувофиқ 2022 йил 1 сентябрдан бошлаб даволаш-профилактика муассасаларининг ходимларига Давлат бюджети маблағлари ҳисобидан фан доктори (Doctor of Science) илмий даражаси учун лавозим маошининг 60 фоизигача ва фан номзоди ёки фалсафа доктори (PhD) илмий даражаси учун лавозим маошининг 30 фоизигача миқдорда ҳар ойлик қўшимча ҳақ тўланиши белгиланганлиги маълумот учун қабул қилинсин.

2. Қўйидагиларни назарда тутувчи Даволаш-профилактика муассасаларининг илмий даражага эга бўлган ходимларига қўшимча ҳақ тўлаш тартиби тўғрисидаги низом иловага мувофиқ тасдиқлансин:

қўшимча ҳақ тўлаш учун тақдим этиладиган ҳужжатлар рўйхати;

даволаш-профилактика муассасаларида қўшимча ҳақ тўлаш мезонлари ва миқдорлари;

қўшимча ҳақ тўлаш мезонлари бўйича ходимнинг кўрсаткичларини ҳисоблаш тартиби.

3. Ўзбекистон Республикаси Давлат бюджетидан молиялаштириладиган даволаш-профилактика муассасалари ходимларига ушбу қарорга мувофиқ қўшимча ҳақ белгиланиши билан боғлиқ харажатларни молиялаштириш Давлат бюджети маблағлари ҳисобидан амалга оширилади.

4. Мазкур қарорнинг бажарилишини назорат қилиш Ўзбекистон Республикаси соғлиқни сақлаш вазири Б.А. Мусаев ва Ўзбекистон Республикаси молия вазири Т.А. Ишметов зиммасига ҳамда Таълим, соғлиқни сақлаш ва спорт масалалари котибиятига юклансин.

**Ўзбекистон Республикасининг
Бош вазири**

А. АРИПОВ

Тошкент ш.,
2022 йил 9 декабрь,
699-сон

* Ушбу қарор «Қонунчилик маълумотлари миллий базаси»да 2022 йил 13 декабрда эълон қилинган.

Вазирлар Маҳкамасининг
2022 йил 9 декабрдаги 699-сон қарорига
ИЛОВА

**Даволаш-профилактика муассасаларининг илмий
даражага эга бўлган ходимларига қўшимча ҳақ тўлаш
тартиби тўғрисида
НИЗОМ**

1-боб. Умумий қоидалар

1. Ушбу Низом давлат даволаш-профилактика муассасаларида (кейинги ўринларда — муассасалар) тиббиёт соҳасида илмни ривожлантиришга ўз ҳиссасини қўшаётган илмий даражага эга бўлган тиббиёт ходимларига ҳар ойлик қўшимча ҳақ тўлаш тартибини белгилайди.

2. Мазкур Низом талаблари республика ихтисослаштирилган илмий-амалий марказларининг Вазирлар Маҳкамасининг 2019 йил 24 декабрдаги 1030-сон қарори билан тасдиқланган Илм-фан ва таълим соҳасидаги давлат ташкилотларида илмий, илмий-педагогик ва меҳнат фаолияти билан шуғулланувчи илмий даражага эга ходимларга қўшимча ҳақ тўлаш тартиби тўғрисидаги низомга мувофиқ қўшимча ҳақ оладиган тиббиёт ходимларига нисбатан татбиқ этилмайди.

3. Муассасаларнинг фан доктори (Doctor of Science), фан номзоди ёки фалсафа доктори (PhD) илмий даражасига эга бўлган ходимларига асосий иш жойи бўйича ушбу Низомга мувофиқ ҳар ойлик қўшимча ҳақ белгиланади.

4. Мазкур Низомда қуйидаги асосий тушунчалар қўлланилади:

лавозим маоши — йилнинг календарь ойи учун муайян мураккабликдаги меҳнат (лавозим) вазибаларини бажариш учун ходимнинг меҳнатига ҳақ тўлашнинг қонунчилик ҳужжатларига мувофиқ белгиланган миқдори (компенсация, рағбатлантириш ва ижтимоий тўловлар, нафақалар ва бошқа қўшимча тўловларни ҳисобга олмаган ҳолда);

қўшимча ҳақ — амалга оширилган муайян иш бўйича натижага эришилганлиги учун ҳар ойда тўланадиган қўшимча тўлов;

ходим — муассасаларда тиббиёт соҳасида илмни ривожлантиришга ўз ҳиссасини қўшаётган илмий даражага эга бўлган тиббиёт ходимлари.

5. Ходимга қўшимча ҳақ унинг жорий йил (календарь йил) мобайнидаги фаолияти натижалари таҳлилига асосан келгуси йил учун белгиланади.

6. Қўшимча ҳақ миқдори ходимнинг эгаллаб турган лавозимига мутаносиб равишда, бироқ бир ставкадан ортиқ бўлмаган миқдорда ҳар ойда ҳисобланадиган лавозим маошига нисбатан белгиланади.

7. Ходим бир нечта муассасада қонунчиликда белгиланган тартибда меҳнат шартномаси асосида фаолият юритаётган бўлса, у асосий иш жойи бўйича қўшимча ҳақ олиш ҳуқуқига эга бўлади.

2-боб. Ходимларга қўшимча ҳақ тўлаш тартиби

8. Ходимларнинг лавозим маошига ҳар ойлик қўшимча ҳақ ушбу Низомга 1-иловада* келтирилган схемага мувофиқ тўланади.

9. Қўшимча ҳақ ушбу Низомга 2-иловада* кўрсатилган мезонларга мувофиқ эришилган фаолият натижаларига асосан тўланади.

10. Ходим муассаса раҳбарига ҳар йили 15 декабрга қадар келгуси йилда қўшимча ҳақ олиш учун ушбу Низомга 2-иловада кўрсатилган ҳужжатларни илова қилган ҳолда ариза тақдим этади.

11. Муассаса раҳбари тақдим этилган ҳужжатларни ўн кун ичида кўриб чиқиб, ходимга келгуси йил учун ойлик лавозим маошига қўшимча ҳақ миқдорини (фоизда) кўрсатган ҳолда буйруқ чиқаради.

Зарур ҳолларда муассаса раҳбари аризани ўрганиб чиқиш жараёнига тегишли мутахассисларни жалб этиши мумкин.

12. Илмий даражага эга бўлган муассаса раҳбари учун қўшимча ҳақ тўлаш тегишли юқори турувчи ташкилот раҳбарининг буйруғига асосан амалга оширилади.

13. Муассаса раҳбарининг буйруғи ходимнинг лавозим маошига ҳар ойлик қўшимча ҳақ тўлаш учун асос ҳисобланади.

14. Қўшимча ҳақ тўлашда ходим томонидан жорий йил 1 январдан бошлаб ариза берилган кунга қадар эришилган натижалар бир календарь йил учун бир марта ҳисобга олинади.

Қуйидаги мезонлар бўйича эришилган натижалар ҳар ойлик қўшимча ҳақ тўлашда ҳар йили инobatга олинади:

илмий даражага эга бўлганлиги;

илмий даража олгандан кейинги даврда янги даволаш усуллари стандартларини жорий этганлиги;

ҳар бир ихтиро ва (ёки) фойдали моделга хорижий ва маҳаллий патент олганлиги.

15. Қўшимча ҳақ миқдори бир ойда — фан номзоди ёки фалсафа доктори илмий даражасига эга ходимлар учун лавозим маошининг 30 фоизидан ҳамда фан доктори илмий даражасига эга ходимлар учун лавозим маошининг 60 фоизидан ошмаслиги керак. Бунда белгиланган мезонлар бўйича ходимнинг эришган кўрсаткичлари унинг илмий даражасига мувофиқ 30 ёки 60 фоиздан ошган тақдирда, қўшимча ҳақ тегишлича 30 ёки 60 фоиз миқдорида ҳисобланади.

16. Ходимнинг ариза берилгандан сўнг ариза берилган йил якунига қадар эришган ва инobatга олинмаган натижалари кейинги йилда қўшимча ҳақ олиш учун мурожаат қилинганда ҳисобга олинади.

17. Ҳар ойлик қўшимча ҳақ бўйича тўловлар тиббиёт ходими тегишли илмий даражага эга бўлган йил якуни билан келгуси йилдан бошлаб ҳисобга олинади. Бунда ходим илмий даража олган йилда амалга оширган барча ишлари ва эришган натижалари кейинги йил учун қўшимча ҳақ тўлашда инobatга олинади.

* 1-2-иловалар «Қонунчилик маълумотлари миллий базаси»да эълон қилинган.

3-боб. Қўшимча ҳақ маблағларини режалаштириш ва молиялаштириш

18. Ташкилот томонидан қўшимча ҳақ белгилаш учун бюджет маблағлари ҳажмини режалаштириш муассаса раҳбарининг буйруғи билан белгиланган илмий даражали ходимлар сонини ҳисобга олган ҳолда амалга оширилади.

19. Ходимларга қўшимча ҳақни белгилаш билан боғлиқ харажатлар штат жадвалида алоҳида акс этирилади ва ташкилотнинг харажатлар сметасида назарда тутилади.

20. Муассасаларда ушбу харажатларни режалаштириш ва тўлаш бўйича буйруқнинг белгиланган муддатдан кеч қабул қилиниши ходим олиши лозим бўлган қўшимча ҳақни йил бошидан бошлаб йил якунига қадар тўламаслик учун асос бўлмайди.

4-боб. Яқунловчи қоидалар

21. Ушбу Низом бўйича ажратиладиган бюджет маблағларининг мақсадли ишлатилиши, қўшимча ҳақ миқдорининг асосланганлиги, тўғри ҳисобланганлиги ҳамда ўз вақтида тўланиши бўйича жавобгарлик муассаса раҳбари зиммасига юклатилади.

22. Ходимлар муассаса раҳбарининг ҳаракатлари (ҳаракатсизлиги) юзасидан қонунчилик ҳужжатларида белгиланган тартибда юқори турувчи ташкилотга ёки судга шикоят қилишлари мумкин.

23. Мазкур Низомни қўллашда юзага келадиган низолар қонунчилик ҳужжатларида белгиланган тартибда ҳал этилади.

24. Ушбу Низом талаблари бузилишида айбдор бўлган шахслар қонунчилик ҳужжатларида белгиланган тартибда жавоб берадилар.

БЕШИНЧИ БЎЛИМ**ЎЗБЕКИСТОН РЕСПУБЛИКАСИ АДЛИЯ ВАЗИРИНИНГ
БУЙРУҒИ**

451 «Фуқаролик ҳолати далолатномаларини қайд этувчи органлар томонидан гербли гувоҳномаларни тўлдириш қоидаларини тасдиқлаш ҳақида»ги буйруққа ўзгартиришлар киритиш тўғрисида*

*Ўзбекистон Республикаси Адлия вазирлиги томонидан 2022 йил
6 декабрда рўйхатдан ўтказилди, рўйхат рақами 3098-1*

Ўзбекистон Республикаси Вазирлар Маҳкамасининг 2022 йил 28 сентябрдаги 540-сон «Фуқаролик ҳолати далолатномаларини ёзиш тартибларини янада такомиллаштириш чора-тадбирлари тўғрисида»ги қарорига мувофиқ **буюрман:**

1. Ўзбекистон Республикаси адлия вазирининг 2018 йил 13 декабрдаги 554-мх-сон «Фуқаролик ҳолати далолатномаларини қайд этувчи органлар томонидан гербли гувоҳномаларни тўлдириш қоидаларини тасдиқлаш ҳақида»ги буйруғига (рўйхат рақами 3098, 2018 йил 13 декабрь) (Қонун ҳужжатлари маълумотлари миллий базаси, 14.12.2018 й., 09/18/3098/2315-сон) иловага мувофиқ ўзгартиришлар киритилсин.

2. Мазкур буйруқ расмий эълон қилинган кундан эътиборан кучга киради.

Вазир

А. ТАШКУЛОВ

Тошкент ш.,
2022 йил 5 декабрь,
27-мх-сон

Келишилди:

Ташқи ишлар вазири

В. НОРОВ

2022 йил 28 ноябрь

* Ушбу буйруқ «Қонунчилик маълумотлари миллий базаси»да 2022 йил 7 декабрда эълон қилинган.

Ўзбекистон Республикаси
адлия вазирининг 2022 йил 5 декабрдаги
27-мх-сон буйруғига
ИЛОВА

**«Фуқаролик ҳолати далолатномаларини қайд этувчи
органлар томонидан гербли гувоҳномаларни тўлдириш
қоидаларини тасдиқлаш ҳақида»ги буйруққа
киритилаётган ўзгартиришлар**

1. Буйруқнинг номи ва 1-бандидаги «қайд этувчи органлар» деган сўзлар «ёзиш органлари» деган сўзлар билан алмаштирилсин.

2. Қоидаларда:

1) номидаги «қайд этувчи органлар» деган сўзлар «ёзиш органлари» деган сўзлар билан алмаштирилсин;

2) муқаддима қуйидаги таҳрирда баён этилсин:

«Мазкур Қоидалар фуқаролик ҳолати далолатномаларини ёзиш органлари (бундан буён матнда ФХДЁ органлари деб юритилади) томонидан гербли гувоҳномалар бланкаларини (бундан буён матнда гербли гувоҳномалар деб юритилади) тўлдириш тартибини белгилайди.»;

3) 10-банд қуйидаги таҳрирда баён этилсин:

«10. Туғилганлик ҳақида гербли гувоҳномада шахснинг туғилган санаси рақамлар ва сўзлар билан ёзилади.

Никоҳ тузилганлиги ва никоҳдан ажралганлик ҳақидаги гербли гувоҳномаларда никоҳ қайд этилган ҳамда никоҳ бекор қилинган йил ва кун рақамлар билан, ой эса ҳарфлар билан ёзилади.»;

4) 12-банд қуйидаги таҳрирда баён этилсин:

«12. Ўлим ҳақидаги гербли гувоҳномада шахс вафот этган йил ва кун рақамлар билан, ой эса ҳарфлар билан ёзилади. Агар ўлим содир бўлган кун ҳақида аниқ маълумот бўлмаса, гувоҳномада фақат аниқ бўлган маълумот ёзилади, аниқ бўлмаган маълумот ўрнига чизик чизилади (масалан, 2018 йил - октябрь).»;

5) 14-банддан «қўлда,» деган сўз чиқариб ташлансин;

6) 16-бандда:

учинчи хатбоши қуйидаги таҳрирда баён этилсин:

«ФХДЁ органи номи ўзгарган тақдирда гербли гувоҳноманинг «Guvohnoma bergan organ» устунида ФХДЁ органининг такрорий гувоҳнома берилаётган вақтдаги номи.»;

тўртинчи хатбоши чиқариб ташлансин.

ЎЗБЕКИСТОН РЕСПУБЛИКАСИ
САНОАТ ХАВФСИЗЛИГИ ДАВЛАТ ҚЎМИТАСИНИНГ
ҚАРОРИ

452 «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомни тасдиқлаш ҳақида»ги буйруқ, шунингдек унга ўзгартиришлар ва қўшимчани ўз кучини йўқотган деб топиш тўғрисида*

*Ўзбекистон Республикаси Адлия вазирлиги томонидан 2022 йил
9 декабрда рўйхатдан ўтказилди, рўйхат рақами 2045-5*

Ўзбекистон Республикаси Вазирлар Маҳкамасининг 2022 йил 29 сентябрдаги 550-сон «Саноат хавфсизлиги соҳасидаги экспертлар фаолиятини такомиллаштириш чора-тадбирлари тўғрисида»ги қарорига мувофиқ Ўзбекистон Республикаси Саноат хавфсизлиги давлат қўмитаси **қарор қилади:**

1. Айрим идоравий норматив-ҳуқуқий ҳужжатлар иловага мувофиқ ўз кучини йўқотган деб топилсин.

2. Мазкур қарор Ўзбекистон Республикаси Бандлик ва меҳнат муносабатлари вазирлиги, Фавқулодда вазиятлар вазирлиги, Қурилиш вазирлиги, Давлат геология ва минерал ресурслар қўмитаси, Монополияга қарши курашиш қўмитаси, Ўзбекистон техник жиҳатдан тартибга солиш агентлиги ва Ўзбекистон касаба уюшмалари Федерацияси Кенгаши билан келишилган.

3. Мазкур қарор расмий эълон қилинган кундан эътиборан кучга киради.

Раис

Б. ФУЛОМОВ

Тошкент ш.,
2022 йил 29 ноябрь,
09/ЮБ-36-сон

Келишилди:

**Бандлик ва меҳнат
муносабатлари вазири**

Н. ХУСАНОВ

2022 йил 3 ноябрь

**Фавқулодда
вазиятлар вазири**

А. КУЛДАШЕВ

2022 йил 10 ноябрь

* Ушбу қарор «Қонунчилик маълумотлари миллий базаси»да 2022 йил 12 декабрда эълон қилинган.

Қурилиш вазири

Б. ЗАКИРОВ

2022 йил 8 ноябрь

*Давлат геология ва минерал
ресурслар қўмитасининг раиси*

Б. ИСЛОМОВ

2022 йил 29 ноябрь

*Монополияга қарши курашиш
қўмитаси раиси*

Ш. ШАРАХМЕТОВ

2022 йил 7 ноябрь

*Ўзбекистон техник жиҳатдан
тартибга солиш агентлиги
Бош директори*

Д. САТТАРОВ

2022 йил 28 ноябрь

*Ўзбекистон касаба уюшмалари
Федерацияси раиси*

К. РАФИКОВ

2022 йил 3 ноябрь

Ўзбекистон Республикаси
Саноат хавфсизлиги давлат қўмитасининг
2022 йил 29 ноябрдаги
09/ЮБ-36-сон қарорига
ИЛОВА

**Ўз кучини йўқотган деб топилаётган идоравий норматив-
ҳуқуқий ҳужжатлар
РЎЙХАТИ**

1. Ўзбекистон Республикаси Саноатда, кончиликда ва коммунал-маиший секторда ишларнинг бехатар олиб борилишини назорат қилиш давлат инспекцияси бошлигининг 2009 йил 29 сентябрдаги 184-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомни тасдиқлаш ҳақида»ги буйруғи (рўйхат рақами 2045, 2009 йил 19 ноябрь) (Ўзбекистон Республикаси қонун ҳужжатлари тўплами, 2009 й., 47-сон, 513-модда).

2. Ўзбекистон Республикаси Вазирлар Маҳкамаси ҳузуридаги Ер қаъри-ни геологик ўрганиш, саноатда, кончиликда ва коммунал-маиший секторда ишларнинг бехатар олиб борилишини назорат қилиш давлат инспекцияси

бошлигининг 2010 йил 6 декабрдаги 343-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисида низомга ўзгартиришлар киритиш ҳақида»ги буйруғи (рўйхат рақами 2045-1, 2011 йил 5 январь) (Ўзбекистон Республикаси қонун ҳужжатлари тўплами, 2011 й., 1-2-сон, 11-модда).

3. Ўзбекистон Республикаси Вазирлар Маҳкамаси ҳузуридаги Ер қаъри-ни геологик ўрганиш, саноатда, кончиликда ва коммунал-маиший секторда ишларнинг беҳатар олиб борилишини назорат қилиш давлат инспекцияси бошлигининг 2014 йил 5 августдаги 104-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомга ўзгартиришлар ва қўшимча киритиш ҳақида» буйруғи (рўйхат рақами 2045-2, 2014 йил 13 август) (Ўзбекистон Республикаси қонун ҳужжатлари тўплами, 2014 й., 33-сон, 425-модда).

4. Ўзбекистон Республикаси Саноат хавфсизлиги давлат қўмитасининг 2019 йил 28 декабрдаги 09/ЮБ-51-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомга ўзгартиришлар киритиш тўғрисида»ги қарори (рўйхат рақами 2045-3, 2020 йил 5 февраль) (Қонун ҳужжатлари маълумотлари миллий базаси, 05.02.2020 й., 10/20/2045-3/0131-сон).

5. Ўзбекистон Республикаси Саноат хавфсизлиги давлат қўмитасининг 2022 йил 30 июндаги 09/ЮБ-26-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомнинг 1-иловасига ўзгартириш киритиш ҳақида»ги қарори (рўйхат рақами 2045-4, 2022 йил 13 июль) (Қонунчилик маълумотлари миллий базаси, 13.07.2022 й., 10/22/2045-4/0635-сон).

ЎЗБЕКИСТОН РЕСПУБЛИКАСИ
ОЛИЙ ВА ЎРТА МАХСУС ТАЪЛИМ ВАЗИРЛИГИ
ЎЗБЕКИСТОН РЕСПУБЛИКАСИ БАНДЛИК ВА
МЕХНАТ МУНОСАБАТЛАРИ ВАЗИРЛИГИНИНГ
ҚАРОРИ

453 Академик лицейлар битирувчиларига мутахассисликлар бериш тартиби тўғрисидаги низомга ўзгартиришлар киритиш ҳақида*

*Ўзбекистон Республикаси Адлия вазирлиги томонидан 2022 йил
9 декабрда рўйхатдан ўтказилди, рўйхат рақами 2882-2*

Ўзбекистон Республикасининг «Таълим тўғрисида»ги Қонуни, Ўзбекистон Республикаси Президентининг 2019 йил 6 сентябрдаги ПФ–5812-сон «Профессионал таълим тизимини янада такомиллаштиришга доир қўшимча чора-тадбирлар тўғрисида»ги Фармони ҳамда 2020 йил 3 декабрдаги ПҚ–4910-сон «Иқтидорли ёшларни саралаб олиш тизими ва академик лицейлар фаолиятини такомиллаштириш чора-тадбирлари тўғрисида»ги қарорига мувофиқ Ўзбекистон Республикаси Олий ва ўрта махсус таълим вазирлиги ва Бандлик ва меҳнат муносабатлари вазирлиги **қарор қилади:**

1. Ўзбекистон Республикаси Олий ва ўрта махсус таълим вазирлигининг Ўрта махсус, касб-хунар таълими маркази ҳамда Меҳнат вазирлигининг 2017 йил 7 апрелдаги 22/ҚҚ ва 8-Қ/Қ-сон қарори (рўйхат рақами 2882, 2017 йил 10 май) (Ўзбекистон Республикаси қонун ҳужжатлари тўплами, 2017 й., 19-сон, 350-модда) билан тасдиқланган Академик лицейлар битирувчиларига мутахассисликлар бериш тартиби тўғрисидаги низомга иловага мувофиқ ўзгартиришлар киритилсин.

2. Мазкур қарор расмий эълон қилинган кундан эътиборан кучга киради.

**Олий ва ўрта махсус
таълим вазири**

А. ТОШКУЛОВ

Тошкент ш.,
2022 йил 24 ноябрь,
22-2022-сон

**Бандлик ва меҳнат
муносабатлари вазири**

Н. ХУСАНОВ

Тошкент ш.,
2022 йил 16 ноябрь,
32-2022/ҚҚ-сон

* Ушбу қарор «Қонунчилик маълумотлари миллий базаси»да 2022 йил 12 декабрда эълон қилинган.

Ўзбекистон Республикаси
Олий ва ўрта махсус таълим вазирлигининг
2022 йил 24 ноябрдаги 22-2022-сон ҳамда
Бандлик ва меҳнат муносабатлари
вазирлигининг 2022 йил 16 ноябрдаги
32-2022/ҚҚ-сон қарорига
ИЛОВА

**Академик лицейлар битирувчиларига мутахассисликлар
бериш тартиби тўғрисидаги низомга киритилаётган
ўзгартиришлар**

1. 4-банд ва 15-банднинг бешинчи хатбошисидаги «махсус фан» деган сўзлар «касбий фан» деган сўзлар билан алмаштирилсин.

2. 12-бандда:

биринчи хатбошидаги «академик лицей директорининг» деган сўзлар «тегишли олий таълим муассасаси ректорининг» деган сўзлар билан алмаштирилсин;

бешинчи хатбоши қуйидаги таҳрирда баён этилсин:

«комиссия аъзолари — тегишли олий таълим муассасаси вакили, шунингдек академик лицей ҳамда келишув асосида турдош профессионал таълим муассасаларининг касбий фан ўқитувчилари.»

3. 19-банднинг биринчи хатбошисидаги «кейинги ўқув йили бошлангунга қадар (бирок, академик лицейни тамомлаганлик тўғрисидаги диплом берилгунга қадар)» деган сўзлар «академик лицейни тамомлаганлик тўғрисидаги диплом берилгунга қадар» деган сўзлар билан алмаштирилсин.

4. 20-банддаги «академик лицей директорининг» деган сўзлар «тегишли олий таълим муассасаси ректорининг» деган сўзлар билан алмаштирилсин.

5. Низомнинг иловаси мазкур ўзгартиришларнинг иловасига мувофиқ таҳрирда баён этилсин.

Академик лицейлар битирувчиларига
мутахассисликлар бериш тартиби тўғрисида-
ги низомга киритилаётган ўзгартиришларга
ИЛОВА

«Академик лицейлар битирувчиларига
мутахассисликлар бериш тартиби
тўғрисидаги низомга
ИЛОВА

Академик лицей сертификатининг давлат намунаси

Академик лицей сертификатининг ТАВСИФИ

Сертификат 105x297 мм ўлчамда, қоғози 100% пахтадан тайёрланган, зичлиги 120+5 гр/м², оқартиргичсиз, акс этмайдиган ультрабинафша нур ва миллий орнамент нақши кўринишидаги сув белгисидан иборат бўлади.

Сертификат бланкасининг юз томони юқори қисми марказида диаметри 30 мм бўлган Ўзбекистон Республикаси Давлат герби (рангли) тасвири туширилади. Давлат гербидан (рангли) 10 мм паст қисмида «**O‘ZBEKISTON RESPUBLIKASI**» сўзлари, унинг таг қисмида «**SERTIFIKAT**» сўзи кизил рангда лотин алифбосида ёзилади.

Матн — Сертификат бланкаси ички қисми чап томонида лотин алифбосида, ўнг томонида инглиз тилида тегишли ёзувлар туширилади.

Сертификат варағи ички қисмининг икки тарафи марказида «Хумо» қуши (25x10 мм ўлчамда) қиёфаси кўринмайдиган тасвири жойлаштирилади ва мазкур қуш қиёфаси ультрабинафша нурлари остида кўринади.

Сертификат бланкаси қуйидаги ҳимоя элементлари билан тайёрланади:

а) тартиб рақами қора флуоресценция бўёғида чоп этилиб, ультрабинафша нурларида яшил рангда ёруғлик сочади;

б) босма жараёнида кимёвий барқарор матбаа бўёқлардан фойдаланади;

в) ҳар хил шаклдаги растрли сеткалардан фойдаланиш;

г) махсус ҳимояланган сув белгили қоғоз ишлатиш;

д) давлат гербини рангли тасвирлаш;

е) кичик матн бир неча бор катталаштирилганда кўринадиган сертификат саҳифасининг матн чизикларида жойлашади ва такрорланувчи «O‘ZBEKISTON RESPUBLIKASI» микроматнли сўз бирикмаси мавжуд.

Сертификатнинг ташқи ўнг томони:

(O'zbekiston Respublikasi Davlat gerbining tasviri)

**O'ZBEKISTON RESPUBLIKASI
SERTIFIKAT**

Сертификатнинг ички чап томони:

**O'ZBEKISTON RESPUBLIKASI
AKADEMIK LITSEY SERTIFIKATI**

LS № _____

(diplomsiz kuchga ega emas)

_____ (familiyasi, ismi, otasining ismi)

20___ yilda _____ (akademik litsey nomi)

_____ ga kirib,
20___yilda _____ (akademik litsey nomi)

_____ **akademik**
litseyni _____ **yo'nalishi**
(yo'nalish nomi)

bo'yicha tamomladi hamda _____ mutaxassisligi berildi.
(mutaxassislik nomi)

M.O'.

*Davlat attestatsiya
komissiyasi raisi*

*Direktor
Kotib(a)*

_____ shahri (tumani), 20___ yil Ro'yxat raqami _____

Сертификатнинг ички ўнг томони:

**THE REPUBLIC OF UZBEKISTAN
CERTIFICATE OF ACADEMIC LYCEUM**

LS № _____

(not valid without diploma)

(full name)

enrolled in 20 _____

(name of academic lyceum)

and completed in 20 _____

(name of academic lyceum)

having specialized in _____

(field of study)

having specialist in _____

(speciality)

(Seal)

*Chairman of the State
Attestation commission*

*Director
Kotib(a)*

Given _____

Registration № _____».

ЎЗБЕКИСТОН РЕСПУБЛИКАСИ МОЛИЯ ВАЗИРИНИНГ
БУЙРУҒИ**454** Ўзбекистон Республикаси ҳудудида қўллаш учун молиявий ҳисоботнинг халқаро стандартлари ва унга тушунтиришлар матнини тан олиш тўғрисида*

*Ўзбекистон Республикаси Адлия вазирлиги томонидан 2022 йил
9 декабрда рўйхатдан ўтказилди, рўйхат рақами 3400*

Ўзбекистон Республикасининг «Бухгалтерия ҳисоби тўғрисида»ги Қонуни ва Ўзбекистон Республикаси Президентининг 2020 йил 24 февралдаги ПҚ–4611-сон «Молиявий ҳисоботнинг халқаро стандартларига ўтиш бўйича қўшимча чора-тадбирлар тўғрисида»ги қарори ва Ўзбекистон Республикаси Вазирлар Маҳкамасининг 2020 йил 24 августдаги 507-сон «Молиявий ҳисоботнинг халқаро стандартлари ва унга тушунтиришлар матнини тан олиш тартиби тўғрисидаги низомни тасдиқлаш ҳақида»ги қарорига мувофиқ **буюраман:**

1. Ўзбекистон Республикаси ҳудудида қўллаш учун қуйидаги молиявий ҳисоботнинг халқаро стандартлари ва унга тушунтиришлар матнлари:

Молиявий ҳисоботларни тақдим этишнинг концептуал асоси 1-иловага** мувофиқ;

1-сон «Молиявий ҳисоботни тақдим этиш» Бухгалтерия ҳисобининг халқаро стандарти 2-иловага** мувофиқ;

2-сон «Захиралар» Бухгалтерия ҳисобининг халқаро стандарти 3-иловага** мувофиқ;

7-сон «Пул маблағлари ҳаракати тўғрисидаги ҳисобот» Бухгалтерия ҳисобининг халқаро стандарти 4-иловага** мувофиқ;

8-сон «Ҳисоб сиёсати, ҳисоб баҳоларидаги ўзгаришлар ва хатолар» Бухгалтерия ҳисобининг халқаро стандарти 5-иловага** мувофиқ;

10-сон «Ҳисобот давридан кейинги ходисалар» Бухгалтерия ҳисобининг халқаро стандарти 6-иловага** мувофиқ;

12-сон «Фойда солиқлари» Бухгалтерия ҳисобининг халқаро стандарти 7-иловага** мувофиқ;

16-сон «Асосий воситалар» Бухгалтерия ҳисобининг халқаро стандарти 8-иловага** мувофиқ;

19-сон «Ходимларнинг даромадлари» Бухгалтерия ҳисобининг халқаро стандарти 9-иловага** мувофиқ;

20-сон «Давлат грантлари ҳисоби ва давлат ёрдами тўғрисидаги маълумотларни ёритиб бериш» Бухгалтерия ҳисобининг халқаро стандарти 10-иловага** мувофиқ;

21-сон «Валюта курсларидаги ўзгаришларнинг таъсирлари» Бухгалтерия ҳисобининг халқаро стандарти 11-иловага** мувофиқ;

* Ушбу буйруқ «Қонунчилик маълумотлари миллий базаси»да 2022 йил 13 декабрда эълон қилинган.

** 1 — 11-иловалар «Қонунчилик маълумотлари миллий базаси»да эълон қилинган.

23-сон «Қарзлар бўйича сарфлар» Бухгалтерия ҳисобининг халқаро стандарти 12-иловага* мувофиқ;

24-сон «Боғлиқ томонлар тўғрисидаги маълумотларни ёритиб бериш» Бухгалтерия ҳисобининг халқаро стандарти 13-иловага* мувофиқ;

26-сон «Пенсия дастурлари бўйича бухгалтерия ҳисоби ва ҳисоботи» Бухгалтерия ҳисобининг халқаро стандарти 14-иловага* мувофиқ;

27-сон «Алоҳида молиявий ҳисобот» Бухгалтерия ҳисобининг халқаро стандарти 15-иловага* мувофиқ;

28-сон «Таъсир остидаги ташкилотларга ва қўшма корхоналарга инвестициялар» Бухгалтерия ҳисобининг халқаро стандарти 16-иловага* мувофиқ;

29-сон «Гиперинфляцияли иқтисодиётда молиявий ҳисобот» Бухгалтерия ҳисобининг халқаро стандарти 17-иловага* мувофиқ;

32-сон «Молиявий инструментлар: тақдим этиш» Бухгалтерия ҳисобининг халқаро стандарти 18-иловага* мувофиқ;

33-сон «Бир акцияга тўғри келадиган фойда» Бухгалтерия ҳисобининг халқаро стандарти 19-иловага* мувофиқ;

34-сон «Оралиқ молиявий ҳисобот» Бухгалтерия ҳисобининг халқаро стандарти 20-иловага* мувофиқ;

36-сон «Активларнинг қадрсизланиши» Бухгалтерия ҳисобининг халқаро стандарти 21-иловага* мувофиқ;

37-сон «Баҳоланган мажбуриятлар, шартли мажбуриятлар ва шартли активлар» Бухгалтерия ҳисобининг халқаро стандарти 22-иловага* мувофиқ;

38-сон «Номоддий активлар» Бухгалтерия ҳисобининг халқаро стандарти 23-иловага* мувофиқ;

39-сон «Молиявий инструментлар: тан олиш ва баҳолаш» Бухгалтерия ҳисобининг халқаро стандарти 24-иловага* мувофиқ;

40-сон «Инвестиция кўчмас мулки» Бухгалтерия ҳисобининг халқаро стандарти 25-иловага* мувофиқ;

41-сон «Қишлоқ хўжалиги» Бухгалтерия ҳисобининг халқаро стандарти 26-иловага* мувофиқ;

1-сон «Молиявий ҳисоботнинг халқаро стандартларини биринчи марта қўллаш» Молиявий ҳисоботнинг халқаро стандарти 27-иловага* мувофиқ;

2-сон «Акцияга асосланган тўлов» Молиявий ҳисоботнинг халқаро стандарти 28-иловага* мувофиқ;

3-сон «Бизнес бирлашувлари» Молиявий ҳисоботнинг халқаро стандарти 29-иловага* мувофиқ;

4-сон «Суғурта шартномалари» Молиявий ҳисоботнинг халқаро стандарти 30-иловага* мувофиқ;

5-сон «Сотиш учун мўлжалланган узоқ муддатли активлар ва тугатилган фаолият» Молиявий ҳисоботнинг халқаро стандарти 31-иловага* мувофиқ;

6-сон «Фойдала қазилмаларни геологик қидириш ва баҳолаш» Молиявий ҳисоботнинг халқаро стандарти 32-иловага* мувофиқ;

7-сон «Молиявий инструментлар: маълумотларни ёритиб бериш» Молиявий ҳисоботнинг халқаро стандарти 33-иловага* мувофиқ;

* 12 — 33-илловалар «Қонунчилик маълумотлари миллий базаси»да эълон қилинган.

8-сон «Операцион сегментлар» Молиявий ҳисоботнинг халқаро стандарти 34-иловага* мувофиқ;

9-сон «Молиявий инструментлар» Молиявий ҳисоботнинг халқаро стандарти 35-иловага* мувофиқ;

10-сон «Консолидациялашган молиявий ҳисобот» Молиявий ҳисоботнинг халқаро стандарти 36-иловага* мувофиқ;

11-сон «Биргаликдаги фаолият бўйича келишувлар» Молиявий ҳисоботнинг халқаро стандарти 37-иловага* мувофиқ;

12-сон «Бошқа ташкилотлардаги улушларни ёритиб бериш» Молиявий ҳисоботнинг халқаро стандарти 38-иловага* мувофиқ;

13-сон «Ҳаққоний қийматни баҳолаш» Молиявий ҳисоботнинг халқаро стандарти 39-иловага* мувофиқ;

14-сон «Кечиктирилган тариф фарқлари счётлари» Молиявий ҳисоботнинг халқаро стандарти 40-иловага* мувофиқ;

15-сон «Харидорлар билан шартномалар бўйича тушум» Молиявий ҳисоботнинг халқаро стандарти 41-иловага* мувофиқ;

16-сон «Ижара» Молиявий ҳисоботнинг халқаро стандарти 42-иловага* мувофиқ;

7-сон «Евронинг муомалага киритилиши» Шарҳлар бўйича доимий қўмитанинг шарҳи 43-иловага* мувофиқ;

10-сон «Давлат ёрдами-операцион фаолият билан муайян боғлиқликнинг йўқлиги» Шарҳлар бўйича доимий қўмитанинг шарҳи 44-иловага* мувофиқ;

25-сон «Фойда солиқлари — ташкилотнинг ёки унинг акциядорларининг солиқ мақомидаги ўзгаришлар» Шарҳлар бўйича доимий қўмитанинг шарҳи 45-иловага* мувофиқ;

29-сон «Хизмат кўрсатиш бўйича концессия келишувлари: Маълумотларни ёритиб бериш» Шарҳлар бўйича доимий қўмитанинг шарҳи 46-иловага* мувофиқ;

32-сон «Номоддий активлар — вебсайт сарфлари» Шарҳлар бўйича доимий қўмитанинг шарҳи 47-иловага* мувофиқ;

1-сон «Объектларни фойдаланишдан чиқариш, атроф муҳитни қайта тиклаш ва шу каби мажбуриятлардаги ўзгаришлар» Молиявий ҳисоботнинг халқаро стандартларини шарҳлаш қўмитаси шарҳи 48-иловага* мувофиқ;

2-сон «Кооператив ташкилотларда иштирокчиларнинг улушлари ва шу каби инструментлар» Молиявий ҳисоботнинг халқаро стандартларини шарҳлаш қўмитаси шарҳи 49-иловага* мувофиқ;

5-сон «Объектларни фойдаланишдан чиқариш, атроф муҳитни қайта тиклаш ва экологик реабилитация фондларида иштирок этиш ҳуқуқлари» Молиявий ҳисоботнинг халқаро стандартларини шарҳлаш қўмитаси шарҳи 50-иловага* мувофиқ;

6-сон «Махсус бозорда иштирок этишдан юзага келадиган мажбуриятлар — чикинди электр ва электрон ускуналар» Молиявий ҳисоботнинг халқаро стандартларини шарҳлаш қўмитаси шарҳи 51-иловага* мувофиқ;

7-сон «29-сон БҲХС «Гиперинфляцияли иқтисодиётда молиявий ҳисо-

* 34 — 51-илвалар «Қонунчилик маълумотлари миллий базаси»да эълон қилинган.

бот» асосида қайта ҳисоблаш ёндашувини қўллаш» Молиявий ҳисоботнинг халқаро стандартларини шарҳлаш қўмитаси шарҳи 52-иловага* мувофиқ;

10-сон «Оралиқ молиявий ҳисобот ва кадрсизланиш» Молиявий ҳисоботнинг халқаро стандартларини шарҳлаш қўмитаси шарҳи 53-иловага* мувофиқ;

12-сон «Хизмат кўрсатиш бўйича концессия келишувлари» Молиявий ҳисоботнинг халқаро стандартларини шарҳлаш қўмитаси шарҳи 54-иловага* мувофиқ;

14-сон «19-сон БҲХС — Белгиланган тўловлар бўйича актив учун лимит, минимум молиялаштириш талаблари ва уларнинг ўзаро алоқаси» Молиявий ҳисоботнинг халқаро стандартларини шарҳлаш қўмитаси шарҳи 55-иловага* мувофиқ;

16-сон «Чет эл бўлинмасига соф инвестицияни хежлаш» Молиявий ҳисоботнинг халқаро стандартларини шарҳлаш қўмитаси шарҳи 56-иловага* мувофиқ;

17-сон «Пулсиз активларнинг мулкдорларга тақсимланиши» Молиявий ҳисоботнинг халқаро стандартларини шарҳлаш қўмитаси шарҳи 57-иловага* мувофиқ;

19-сон «Молиявий мажбуриятларни улушли инструментлар билан сўндириш» Молиявий ҳисоботнинг халқаро стандартларини шарҳлаш қўмитаси шарҳи 58-иловага* мувофиқ;

20-сон «Очиқ коннинг қазиб чиқариш босқичидаги устки қатламни очиш сарфлари» Молиявий ҳисоботнинг халқаро стандартларини шарҳлаш қўмитаси шарҳи 59-иловага* мувофиқ;

21-сон «Мажбурий тўловлар» Молиявий ҳисоботнинг халқаро стандартларини шарҳлаш қўмитаси шарҳи 60-иловага* мувофиқ;

22-сон «Чет эл валютасидаги операциялар ва олдиндан тўлов» Молиявий ҳисоботнинг халқаро стандартларини шарҳлаш қўмитаси шарҳи 61-иловага* мувофиқ;

23-сон «Фойда солиғини ҳисоблаш тартибига нисбатан ноаниқликлар» Молиявий ҳисоботнинг халқаро стандартларини шарҳлаш қўмитаси шарҳи 62-иловага* мувофиқ тан олинсин.

2. Мазкур буйруқ расмий эълон қилинган кундан эътиборан кучга кирди.

Вазир

Т. ИШМЕТОВ

Тошкент ш.,
2022 йил 10 ноябрь,
61-сон

* 52 — 62-иловалар «Қонунчилик маълумотлари миллий базаси»да эълон қилинган.

**Ўзбекистон Республикаси Адлия вазирлигининг
вазирликлар, давлат қўмиталари ва идораларнинг
норматив-ҳуқуқий ҳужжатларини давлат рўйхатидан
ўтказиш ҳолати тўғрисида
МАЪЛУМОТИ**

I. Давлат рўйхатидан ўтказилди:

1. Ўзбекистон Республикаси адлия вазирининг 2022 йил 5 декабрдаги 27-мх-сон «Фуқаролик ҳолати далолатномаларини қайд этувчи органлар томонидан гербли гувоҳномаларни тўлдириш қоидаларини тасдиқлаш ҳақида»-ги буйруққа ўзгартиришлар киритиш тўғрисида»ги буйруғи.

2022 йил 6 декабрда рўйхатдан ўтказилди, рўйхат рақами 3098-1.

2. Ўзбекистон Республикаси Саноат хавфсизлиги давлат қўмитасининг 2022 йил 29 ноябрдаги 09/ЮБ-36-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомни тасдиқлаш ҳақида»ги буйруқ, шунингдек унга ўзгартиришлар ва қўшимчани ўз кучини йўқотган деб топиш тўғрисида»ги қарори.

2022 йил 9 декабрда рўйхатдан ўтказилди, рўйхат рақами 2045-5.

3. Ўзбекистон Республикаси Олий ва ўрта махсус таълим вазирлигининг 2022 йил 24 ноябрдаги 22-2022-сон ҳамда Бандлик ва меҳнат муносабатлари вазирлигининг 2022 йил 16 ноябрдаги 32-2022/ҚҚ-сон «Академик лицейлар битирувчиларига мутахассисликлар бериш тартиби тўғрисидаги низомга ўзгартиришлар киритиш ҳақида»ги қарори.

2022 йил 9 декабрда рўйхатдан ўтказилди, рўйхат рақами 2882-2.

4. Ўзбекистон Республикаси молия вазирининг 2022 йил 10 ноябрдаги 61-сон «Ўзбекистон Республикаси ҳудудида қўллаш учун молиявий ҳисоботнинг халқаро стандартлари ва унга тушунтиришлар матнини тан олиш тўғрисида»ги буйруғи.

2022 йил 9 декабрда рўйхатдан ўтказилди, рўйхат рақами 3400.

II. Давлат реестридан чиқарилди:

1. Ўзбекистон Республикаси Саноатда, кончиликда ва коммунал-маиший секторда ишларнинг беҳатар олиб борилишини назорат қилиш давлат инспекцияси бошлиғининг 2009 йил 29 сентябрдаги 184-сон «Саноат хавфсизлиги соҳасидаги экспертларни тайёрлаш ва аттестациядан ўтказиш тартиби тўғрисидаги низомни тасдиқлаш ҳақида»ги буйруғи (рўйхат рақами 2045, 2009 йил 19 ноябрь), шунингдек унга ўзгартиришлар ва қўшимча (рўйхат

рақами 2045-1, 2011 йил 5 январь), (рўйхат рақами 2045-2, 2014 йил 13 август), (рўйхат рақами 2045-3, 2020 йил 5 февраль), (рўйхат рақами 2045-4, 2022 йил 13 июль).

2022 йил 9 декабрда давлат реесридан чиқарилди.

Мазкур ҳужжатлар қонунчиликка ўзгартириш киритилиши ва/ёки янги норматив-ҳуқуқий ҳужжатлар қабул қилиниши муносабати билан давлат реестридан чиқарилди.

